

歸化城廳志

卷七至九

三

歸化城廳志卷之六

濟卹

禮冢宰以三十年之通制國用雖有凶旱水溢民無菜色是
水旱之災雖盛世不能無特能先事備具使不為災耳自後
世不謀蓄積閭閻絕少蓋藏偶值一隅偏災輒至庚癸頻呼
無從措手迨至民飢而死輒諉之於救荒無善策吁豈救荒
之無善策哉前者壬辰癸巳間歸化連年被旱被霜被凍赤
地無收嗷鴻遍野維時

各大憲痾瘵在抱競競以籌欸購糧為先將災黎困苦流
離情形據實入



告遂得

內帑十數萬金漕糧六萬餘石並承鄰省疆臣協力籌助義賑
協賑接踵於途而在事各員尤能苦心孤詣核實散放卒使
口外垂斃之民均慶復蘇不能謂非策之善者也謹詳識於
冊至養濟育嬰牛痘濟生等所類皆鰥寡孤獨之民亦仁政
所必先者特併列焉以示來茲志濟卹

乾隆十年大同等縣秋災奉

旨賑卹是年修大同等八縣城垣代賑安插歸化城就食貧民

乾隆三十七年因災免大同朔平二府額徵兵糧米豆穀麥並太
原等十四府州及歸化城各屬錢糧十分之三

乾隆三十八年七月

上諭

據容保等奏稱歸化城之八十三村蒙古等地被水成災在六分
以上請計其人口借給粟米限二年照數交納等語著照所奏於
歸化城廳倉內動支粟米借給被災之土默特等以資接濟

乾隆四十五年免太原等十六府州並歸化城各廳牧廠地畝應
徵額賦十分之一

乾隆五十五年以災免太原遼州等十六府州並歸化城等處額
賦十分之三

道光二十六年以災蠲緩徐溝等七州縣及歸化城三處額賦
光緒三年十二月

上諭

曾國荃奏勘明被災之陽曲等八十四廳州縣懇准蠲緩錢糧一摺本年山西各廳州縣秋禾被旱被雹被霜成災自應將錢糧米石分別蠲緩其勘不成災各處收成歉薄若照常徵收民力亦有未逮著加恩一律停徵各廳州縣有原緩民欠並著分別蠲緩以蘇民困

光緒四年二月

上諭
山西被災極重本年成災州縣上忙錢糧業經降旨普行蠲免惟自冬徂春雪澤稀少春麥尚未補種若將帶徵各項錢糧屆時照例開徵民力仍有未逮加恩著所有麥熟後應徵成災州縣分年帶徵及各州縣未被災並歉收各村莊著一律緩至光緒五年秋

後再行啟徵以紓民力

六月

上諭

山西自光緒三年辦賑以來所有各廳州縣倉穀近年因災出借之項業經豁免其三年以前實欠在民者若照例徵收不特民力未逮亦恐流亡各戶款項無著胥吏藉以擾民轉滋流弊加恩所有各府廳州縣光緒三年以前歷次民借倉穀無論何款凡實欠在民者均著一律豁免以恤窮黎

以上見通志

歸化城商民捐馬六百匹蒙古蘇呢特郡王之母索隆果特氏捐牛一百隻烏珠穆沁右翼親王浩齊特左翼郡王捐馬五百匹光緒十七年秋歸化城被凍歉收奉文蠲免錢糧出借倉穀

卷查光緒十七年冬十八年春兩次陸續出借過常平倉粟豆備
倉義倉共倉石穀八千五百八十四石一十五升

光緒十八年春歸化城被旱成災省委錫太守良來城設局辦理
撫卹

賑冊自光緒十八年六月起至七月止放給貧民兩個月口糧
計男女大小以兩小口折一大口合計貧民十三萬二千九百
三十三口半每大口兩月口糧倉斗一斗八升共放過倉斗糧
二萬三千九百二十八石三升內

動用過常平倉穀九百五十三石六斗九升六合五勺

收過撫卹局購買雜糧倉斗二萬三千一百五十四石三斗二

升二合五勺共計倉斗糧二萬四千一百八石三升除動用外
餘糧一百八十石存倉

糧價運費均由押荒項下動支

抄錄賑務各稟

光緒十八年六月蒙護撫憲胡行開案據總辦北路米運備濟事

宜候補知府錫良稟稱敬稟者竊卑府前奉憲台委辦口外各

廳撫卹事宜遵將奉委遵辦酌議章程並買糧請款各情形先

後馳稟憲臺已在案現值委員吳直牧曾榮等八員均於五月

十五日馳抵歸化詳細籌商復經稟商歸綏文道均以審戶為

第一要義查歸化廳山後糧地各村及茂明安等旗地方遼潤

縱橫幾及千里去年禾麥無收今年被旱尤甚人心岌岌已與
該廳張署丞妥商先令留道發審委員候補通判程倅世榮率
同分道當差之候補從九葉恩沛候補巡檢柳亦榮會同該管
汛段之管帶練軍馬隊董副將履貞偶守備家訓分路清查其
山前村莊較稠已經張署丞訪延紳士舉人席儒等分路清查
現又加派候補知縣陳令初頭督率各紳認真妥辦至薩拉齊
廳其包頭以面前後套烏拉特三公等旗及黃河以南鄂爾多
斯等旗擴遠過於歸化而村稀戶少則又被災最重已由該廳
周署丞一面懇練軍管帶步隊張副將千功並該管汛段之管帶
馬隊偶守備家訓袁游擊得勝就近代為清查一面由卑府商

同文道函托張副將並懇其轉託袁偏兩營代查包頭以東直
抵歸界綿長二百餘里村落較多查有候補知縣趙令之寔前
經委令赴包會同買糧刻下糧已買齊所有轉運事宜應歸張
副將一手經理騰出趙令赴薩拉齊幫同周署丞及候補府經
歷袁庚華清查戶口可無須再添委員至托克托城廳河口鎮
上通包頭之南海子船糧到此起運分撥實為轉運扼要之處
應設轉運分局查有厘局司事前因越獄革職典史王愈老成
直樸可以住局經理收發並有厘務委員姚令學鏡歸托往來
兩處照料復商候補直隸州知州吳牧曾榮總司其事一面添
派候補知縣許令涵鴻會同該廳汪倅督同該廳巡檢章兆麟

清查戶口並令駐扎練軍哨官方把總來發妥為照料至和林
格爾廳派令候補知縣黃令承琳候補典史韓肇榕候補巡檢
韓青雲會同該廳周署倅清查戶口甯遠廳地勢雖遜歸薩而
北鄰草地輻員亦查清查亦非易查有現在該廳之候補府
經歷張綽該廳司獄吳昌俊候補典史王純道可以對案查復經
該廳馬署倅來城面懇管解烏料軍餉候補知縣葉令雲程幫
同辦理至候補府經歷董國璠候補巡檢戈汝綱應留在總局
經營繕寫帳目等事此各員分布辦理之情形也至清水河廳
據復稱被災稍輕雖經播種苗未出齊盼雨甚殷該廳當軍倉
社義倉共穀五千餘石應令暫緩出放如果再不得雨必需撫

卹再由該廳移知卑府派員幫同清查戶口酌放倉穀以資接濟俾免倉廩空虚轉致過急無措至豐鎮廳應否撫卹未據查覆查該廳劉署丞官聲素著留心民事又有倉穀一萬六千餘石如應撫卹亦足敷用劉署丞諱能詳籌妥辦現在人員不敷分布自可無須派員助理至各廳應設放糧廠所已令各該廳於查戶口之便擇適中大村定設廠幾所一俟擇定覆到即可將糧撥運各廠其分路轉運事宜薩廳包頭以西一帶有應初黃河上游將糧截買就近起運者有應從包頭分糧撥運者統由張副將斟酌情形辦理其包頭以東薩城及各村由包陸運歸化山後各村其距包較近之十二家字號廠汗鳩鵠烏藍不

浪等處亦由包陸運托和兩廳歸化山前及山後距包已遠之
可可以力更等處由包頭南海子水運至托城之河口鎮分別
轉運甯遠尚有倉穀六千餘石現已由豐鎮定買穀于市石二
千石暫行封儲聽候撥運惟口外旱既太甚草芽不長牲畜羊
多餓斃不但干草難買即菽麥稽亦不易得駝隻羸瘦不堪僱
運車脚缺少亦難多覓陸運脚價所費不貲此又現在分路轉
運之情形也再查各廳倉穀歸化無存薩拉齊現存二千二百
餘石豐鎮現存一萬六千餘石甯遠現存六千餘石清水河現
存五千四百餘石和林格爾現存二千九百餘石托城現存四
千餘石由包頭采買市斗雜糧一萬九千餘石用銀五萬五千

五十八兩零托城河口采買穀子市斗二千石小米市斗一千石雜糧市斗二百二十石用銀一萬一千六百六十兩零豐鎮采買市斗穀子二千石用銀五千一百六十兩零除豐鎮未據文覆清水河情形尚輕暫行提開不計外統計歸薩甯和托五廳存穀倉斗一萬四千餘石采買雜糧市斗二萬四千二百餘石合倉斗四萬四千五十餘石共用銀七萬二千四百餘兩當擬撥銀五千兩解交張副將在纏金附近渡口截買甯夏船糧散放前後套一帶貧民冀省脚力另交甯遠馬署倅銀一千兩訪大戶在糧店寄糧數內公平定購市斗千餘石得兩則折本退還否則小有儲備計用銀將及八萬之譜已由綏遠廳庫領

過八□兩而運糧腳價委員薪水一切雜費尚不與焉伏思雜用不能不力求減損而糧石不敢不勉為寬籌亢旱日甚米糧日少所有價值騰昂不能遏抑前懇憲恩撥解銀五六萬伏乞迅賜派員管解來城一面稟商文道先暫由綏遠廳庫借動以應急需此稽核倉儲買糧用款之情形也其一切轉運散放各事宜卑府隨時稟商文道並會商張副將及與印委各員諄諄於清查戶口認真散放俾得實惠及民而議函商不禁唇焦筆禿深知銀糧並絀籌辦萬難斷不肯見好同寅市恩百姓所有各處是否實力辦理當隨時飛稟憲台量予勸懲以昭激勵現在節逾芒種但祝速沛甘霖則晚禾當能播種撫卹即可停止

官民不勝焦盼之至等情到院據此除批據稟悉口外各廳雨澤愆期元旱日甚現且節屆夏至猶未普澤甘霖夏田固無收成秋禾又難播種鴻嗷徧野攘奪頻聞拯救之方緩不濟急本護部院因之寢食俱廢者已踰兩月矣幸聞來稟該守於遊派妥員清查戶口采購糧粟分運災區暨一切籌布情形均屬有條不紊足見實心任事克濟時艱深堪嘉慰派出正佐各員共知以審戶為第一要義尤中肯綮蓋審戶二字既最要而亦最難稍不經意畧悼煩勞遂弊實叢生不可究詰古人論之詳矣邊外幅員遼濶村落蕭疏民居畸零人情愚悍審之不確弊必愈多設其中多有一分虛浮即災祇少受一分實惠是更要而

又更難全賴各該員認真稽查細心訪察凡吏胥約保別有營
謀者斷不容侵渙冒捏其老弱孤寡與苦無依恃者萬不得疏
漏遺忘尤貴登記詳明散放迅捷或可暫資存活免盡流亡歸
薩兩廳被災之重固不待言餘如和林托城甯遠等廳雖經前
批分晰核示究應如何接濟既已委員分往會查仍由該守体
察情形妥為籌辦總之賑撫關係至重經畫不厭精詳時日甚
長地方又廣

國

家庫儲支絀籌發維艱粮石遠道購求分運非日必須事臻核實
方可多濟災黎區區此心該守等其共鑒之印委正佐各員果
皆善体力行措施悉當本護院定予優獎以勵勤能否則亦必

分別撤參不能曲為寬貸也並由該守隨時考察密稟以聞如有將雨之區呈飛具報毋延

光緒十八年五月署歸化城同知張賬務稟

敬啟者案蒙歸綏道憲轉奉撫憲札飭據候補知府錫守稟稱歸化廳旱元太甚山後尤重亟宜確查戶口酌給口糧恐廳存常平並備等倉穀為數無多不敷濟用即在綏遠廳庫存押荒項下提動銀兩發交錫守具領派員分赴糧多處所採買各項糧石先就廳存倉穀查明極次貧民核實散放派錫守總司其事會同地方官妥籌辦理倉穀不敷以採買之糧濟用飭將卑廳如何辦理撫卹情形稟報查考並牒錫守核辦等因蒙此

除提銀買糧暨應辦撫恤各事宜已經卑職會同錫守商議章
程由錫守徑面憲監臣毋庸冗叙外遵將卑廳元旱擬辦撫恤情
形為憲台分晰陳之查卑廳常平倉實存倉斗穀二千四百石
豐備倉實存穀六千二十一石義倉實存穀一千一百一十二石
三倉共實存倉斗穀四千七百六十三石卑前署廳平丞勝
因去歲歉收今春又旱乏食貧民甚夥已先後稟詳憲台批准
將三倉儲穀出借各村貧民現已領食大半卑職到任准移查
出得賄冒領倉穀之倉書串通甲頭楊胡林當即拘提訊明追
出冒領之穀分別責枷一面將未放倉穀親身赴倉監放貧民
惟廳屬數百餘村迄今無雨飢民更多各倉穀行將放竣必須

買糧接濟此卒聽倉穀不敷濟用之實在情形也此後旱象已成亟宜賑撫自以審查戶口為第一要義第僅派書差亦恐滋擾當即飛函託山後練軍六旗董副將山前陳都司幫派妥弁編查戶口一面會商錫守派候補程倅世榮帶領葉從九恩沛柳從九亦榮及書差等往山後分三路會同董榮派弁一同編查隨給甲會貧戶總散執照以憑示期設廠領穀其委員薪水車馬及書差飯錢車錢均由局給發臨行又同委員嚴切吩咐不准騷擾該村一草一木如有即查明就地正法如無歸來必有獎勵去後疊接程倅等來函各分查地段極火者四五百里柳亦榮分查之製裘地方約有七百里之遙距城千里非兩三

月不能查清而飢民待哺岌岌難待有隨查隨須放米者有查
完趕須放米者萬不能再顧山前不得已與錫守商酌又請本
地紳士席孝廉等三人分東南東北西南三路幫查又派陳令
初頭查西北路均吩咐照山後一樣查法不准遺濫至從前保
甲皆係紙上空談今撫憲認真保甲以衛閭閻即乘該員紳下
鄉查賬之便令其該村坐落某旗距城若干里戶口若干田
地若干以及甲頭會首何人一一刊刻刷印多張請將一村查
完即照填寫以免另查保甲再籌經費一舉兩得此舉職會同
錫守查辦山前山後戶口之實在情形也查歸化城向有濟生
店養濟貧民係前任歸綏道愚阿籌款創辦以六七百人為度



664780

派員二人總理每年十月初一開店次年三月底截止今因貧民
太多展期一月至四月底截止卑職想年歲順成貧民至夏
可以受苦謀生今五月中旬尚無雨澤貧民若無養食濟只有坐
以待斃且有老弱殘疾不能受苦者又有各村來城乞食者必
須設法安置貧民方有生機然救荒之舉宜散而不宜聚使
徒博好施之名不定章程恐聞風而至者絡繹不絕又或立二月
包頭粥廠之勢卑職再思思維已於前數日出示曉諭現已奉
撫憲委員來歸設局分路查賑爾等在城貧民趕回各村聽候
編查勿得自悞以示城裏決不辨賑之意其無家可歸之貧民
擬擇老弱殘疾者以五百人為度每人給以腰牌即在濟生店

日給粥二次養至十月初一仍歸善舉中辦理此款由卑職籌
辦又擇少壯能受苦者數百人令建蓋捕盜營房剏道廳置前
河身給錢糊口隱寓以工代賑之意庶飢民不至聚而難散此卑
職籌辦在城飢民之實在情形也卑職到任甫經一月以上諸
事不過盡心盡力為之今更有所請者一請設法多籌款項
購儲糧石預運口外一請飛札嚴飭各屬趕除禁糧之令以
裕來源一請將搶糧之人擇其情節較重者許各所官一面通票
一面就地正法如此為之可以保撫恤之長局可以消未然之
巨患請申請之查歸化之糧全恃大青山後數十年皆係豐年
照耕九餘三之議雖三年不收亦可無害無如口外種地者

非土著蒙古地又只准租種不得置買如不准種即湏拆屋而
徙且人工甚貴谷價又賤除租銀工費外無所餘以致年年豐
收愚民決不計荒年之苦視糧石為不甚愛惜之物故知蓋藏
者百無一二山後之來城糶糧者每年約有三十萬石去年五
月望後始降雨八月初即降霜故進口只十一二萬城中糧店
十二家每年所進僅敷一年糶賣去年所入較往年已欠大半
有力之家鑒於歉收糧貴已多預定目下糧店所囤者皆有
主之糧無主者每家不過二三十石現已異常空虛若五月底無
雨則顆粒無進其空虛更不可思議且錫守來辦撫卹首先在
包頭購糧由河口船運托城由托城陸運山後其有後山近包

頭之處由包頭托張副將千功陸運現接張副將來函一路無
草脚戶不攬卑職與錫守異常焦急此時若不多籌款項預由
口裏購運恐他日愈久愈難必至有款無糧有糧難運無數飢
民何以為生卑職泣求憲公設法多籌款項購儲糧石預運口
外者此也口外去年歉收今夏無雨甯夏路途太遠全恃口裏
為來源其商賈亦願出口謀利如有此來源糧價亦不致太昂
辦賑尚易措手無如忻代大同並靈甯諸節其前糧夫春秋之時
分國而居尚有無過糶之約況此時天下一家隣省尚不可况一
省乎丁戊山西大祲口外並靈收經前北鎮張建侯軍門在口外
買糧由黃河運至磧口省南賴以全活者甚眾百姓至今感之

皇朝

今日外荒旱口裏禁糶是晉飢秦輸之粟秦飢晉閉之糶口
外之人能無怨乎且禁糶之事徒資胥吏訛詐無益乎民生機
伏讀

經世文編荒政門唐夢賚禁糶說力言禁糶之弊卑職泣求憲
台飛札嚴飭各屬趕除禁糶之令以裕來源者此也口外民情蠻
野向來難化今飢寒交迫故常有搶糧之事然其中有實飢餓
難忍而搶者有並非飢民而藉名乘勢率領多人執械而搶者
卑職以為此種案件審明實係飢餓難忍或只搶一人一家者
從重笞責枷號犯事地方如並非飢民率領多人持械搶奪形
同強盜罪不容誅抑或搶劫由包運往各所之糧則商賈必然

裹足此時本地無糧口裹又多禁糶必致數萬命之生機全斷情
尤可惡此二項情形若照搶案辦理層層轉報半年後始遭
顯戮恐頑民無所懲戒搶風難壓關係非輕必當審實後就地正
法懸首犯事地方並河口一帶始定遏亂萌而裕糧源卑職請
將搶糧之案擇其情節較重者許各廳官一面通稟一面就地
正法者此也口外去年歉收百姓蓋藏已屬不支今夏又無雨
澤草根幾於食盡目下死亡山前山後城內日百餘人若五月
底無雨六月即有透雨亦不能種且天寒霜早即種亦不能收
則撫卹之事非辦至明年有糧後不能停止若不預籌長策必
致後難為繼今請多儲糧石預運口外且除各屬禁糶之令則

糧得源源而來貧民飢而不害又將搶糧之人擇情節稍重者
即行斬梟亂民知警言良民自安撫卹之長局庶可以保光緒丁
戌大祲口外豐收糧價甚昂商農皆利故山西飢而不至於亂
去年口外歉收待賑孔殷今夏又無雨澤死亡載道地方又極
遼濶從前游勇馬賊山後所在多有迫以飢寒易於煽惑聳軍
門復新不知何日口外地廣兵單如有意外之虞真不堪設想
今既請預運糧石以養之斬梟搶糧者以懲之並請奏請聳軍
門從速履新則游勇馬賊不能勾結口外未然之巨患庶可以
消卑職以間曹來晉謬蒙憲恩兩調口外煩劇今尚歉收之年
又處口外之地若不痛切言之固無以副高厚之憲恩更無以

對垂斃之飢民故急不擇語泣求憲合俯如所請並請一面勸
捐賑江浙順直請獎一面告急鄰邦多儲糧石趕運口外卑職
幸甚口外數萬生靈幸甚再錫守一片血誠可質神明務求憲
台寬籌款項以資接濟一其事權以專責成如廳官委員紳士
於撫卹之事敢有營私者即由錫守據實面呈揭丁及營私者即
行正法果能實心任事毫無私弊亦由錫守請獎以示賞罰而
杜弊端云云

是年秋隕霜凍未奉文蠲免錢糧冬貧民乏食遵飭就地勸捐並
由省發銀辦理冬賑

賑冊本城及山前後四鄉共放過男女貧民折實大口一十三

萬一千四百六十九口半本城及山後貧民每大口放給市錢
一百五十文山前貧民每大口放倉倉斗糧三升

收過奉發冬賑銀三千兩

又奉發喬致庸捐麥變價銀二千三百兩

又官商張嘉禎喬晉儀等及十五社捐穀捐銀共合捐款銀
一萬一百四十九兩七錢四分四厘

以上共收過銀一萬五千四百四十九兩七錢四分四厘
動用過倉斗糧二千二百五十七石四斗八升五合

又用動市錢八千三百八十三串

除辦冬賑外餘銀五千三百三十五兩四錢四分五厘

又餘糜穀七百九十一石七斗一升五合

又餘市錢二千三百五十九千三百一十六文

解交春撫局銀三千三百三十五兩四錢四分五厘

又解交糜穀七百九十一石七斗一升五合

除解交春撫局外實存銀二千兩市錢二千三百五十九千三百一十六文留作春撫雜費

光緒十九年春民飢省復委錫太守良來城設局辦理春撫

正月內閣奉

上諭

上年山西陽曲等縣收成歉薄北路口外一帶被災尤重閭閻困苦情殊堪憫惻現當青黃不接之時為日方長必須寬為接濟

除諭令張煦妥籌賑撫外加恩着先由戶部撥銀十萬兩解往備賑即著張煦督飭所屬詳查災區重輕核實散放一面將先辦清形迅速覆奏以慰屢懷該部知道欽此

賑冊自光緒十九年二月起至六月底止共放過貧民錢米三次第一次每大口放給一個半月口糧倉斗一斗三升五合以九升作一月口糧以四升五合作為籽種第二次每大口放給一月口糧倉斗九升有地貧民每大口加放贖取農具滿錢一百五十文第三次每大口加給一月口糧倉斗九升

以上三次共貧民折實大口 萬千百十 口共用

過倉斗糧 萬千百十石斗升 合共用

過制錢 萬千一百十千文

收過春撫局及包頭采運局倉斗糧三千六百二石九斗七升
五合

又收賑款銀十二萬五千三百二十四兩二錢三分五厘

又收十八年冬賑用餘銀二千兩市錢二千三百五十九千
三百一十六文

動用過倉斗雜糧三千六百二石九斗七升五合

又動用賑款及運費共銀十一萬八千一百五十一兩
一錢七分四毫六絲五忽

除辦春撫外盡餘賑款銀七千一百七十二兩六分四厘五毫

三絲四忽呈繳春撫局其糧價運費各細數均由春撫局造冊報銷

支給過辦賑員紳弁兵書役薪水飯食等項雜費動用過冬賑餘欸銀一千七百五十四兩八分九厘二毫九絲市錢二千三百五十九千三百一十六文

光緒十八年十一月護理山西巡撫胡奏預籌春賑片

再本年夏初歸綏道屬各廳被旱成災派員設局賑撫並汾州平陽霍州所屬二季歉收分別借谷緩征各情形均經先後陳奏嗣於閏六月霪雨兼旬太原等屬被水成災工賑需欸甚鉅復經臣奏明大概情形請援照順直章程就地開辦振捐藉資

分撥在案茲於八月以後復據大同等屬陸續稟報秋禾被災
等情前來統計先後具報之太原平陽潞安汾州大同甯武朔
平蒲州各府屬並忻州平定代州霍州降州濕州保德各直隸
州並屬以及歸綏道之屬歸化七廳等共五十餘廳州縣或被
水淹或被霜雹秋禾被災輕重不等當飭該管道府直隸州親
請督勘並委員確受受災情形以北路大朔等偏口外各廳為
最重小民流離困苦慘不忍言冬春賑撫亟須籌備無如省北
地瘠糧少戶鮮蓋藏陝直毗連各處又皆山路崎嶇不通販運
惟甘肅甯夏一帶為古河套土地饒沃產糧最夥可由黃河駛
運薩包藉資挹注而奸商大猾輿販囤積每遇歲歉糧缺益復

抬價居奇必須平日籌集鉅款官為收買于包頭河口等處建
立倉厰廣為備積遇災荒不特就地易于賑糶抑且沿河下駛
可以分運太汾直達蒲降乃為晉省備荒之上策刻值救災不
遑何能辦此然欲採購賑米舍此亦更無來源現經飭司籌借
銀十萬兩委員前赴甯夏設法購買俟來歲開河駛運以備接
濟春撫之需至今年冬賑已經飭屬先儘常平社義等倉谷石
查明亟次貧民分別核實散放其儲谷無多動用無存者即于
鄰封就近借撥如再不敷只可將征存未糶之裁兵節省無豆
等項暫准稟請借動撥充賑糧一面酌發銀兩令易錢併放當
此飢寒交迫災民待賑孔殷臣仰體

皇仁

但可設法拯救實未敢過拘成例將來賑務完竣仍擬援案籲懇

天恩

准將用過各項銀米核實彙總開單奏報免造細冊以歸簡易除

被災各屬應行蠲緩錢糧現飭趕緊造冊俟冊到齊再行奉懇

恩施

並咨部查照外所有晉省各屬秋禾續報成災現在籌辦賑撫緣

由理合附片具陳

光緒十九年三月巡撫張 奏為遵

旨覆陳晉省現辦冬春賑撫及籌款購糧各情形恭摺仰祈

聖鑒事竊臣於二月初四日承准軍機大臣字寄正月二十九日奉

上諭本日據內閣學士惲彥彬御史王儼奏山西灾情甚重請飭籌撫

運糧協賑核捐各摺片上年山西邊外七廳及大同等府被災較

廣業由該省籌款賑撫現在青黃不接為日正長小民困苦情形殊堪軫念本日已明降諭旨由戶部撥銀十萬兩交張煦核實散放以惠災黎張煦前奏籌款預購糧石並提運倉存餘贖節省兵米分屯借撥各節現在辦理情形如何即着迅速奏聞以慰廑系該省各州縣就地勸捐原備賑需所不足如有浮派侵吞等弊着該撫從嚴叅辦不得稍存姑息至采運糧石全在商販流通所有直隸山西兩省應收租糧厘稅着李鴻章通飭各屬一律俯收遇有糧運過境飭即妥為護送並發給護照以廣招徠李鴻章於萬全等縣被災地方已派員賑撫該處與山西境地毗連並着該督籌撥賑款飭令派出之員就近在山西邊境協賑俾蘇民困憚彥

島什五庫志 卷之三
彬摺一件片二件王微摺一件片二件均着鈔給閱看將此由四
百里各諭令知之欽此仰見

朝廷軫念晉災

恩施

優渥凡在臣民無不同深欽感遵查上年陽曲等廳州縣報勘成
災者四十七處當經臣於今春青黃不接應行接濟撫恤摺內
將籌辦大概情形

奏明在案開春以來正在飭催辦理查明具奏間欽奉前因恭
錄轉行去後復查晉省去年各屬或遭水旱或被霜雹秋禾成
災輕重不等亟須分別輕重辦理冬賑春撫而款絀糧糶轉運
維難賑撫所須尤須設法籌備方免顧此失彼倉猝不及之虞

前經護撫臣奏准就地開辦賑捐藉資救濟一面先由司庫等籌
動銀十萬兩派員前往甘肅甯夏等處采運米糧並動用常平
社義等倉谷石查放冬賑不敷之處即將裁兵節省米豆等項
按照道里遠近分撥應用除被災較輕及歉收各州縣應辦急
賑正賑加賑並本年青黃不接乏食貧民應行酌撥銀谷備給
口糧籽種均經照例辦理並飭體察情形量予調濟及大同各
屬現辦春撫情形外其口外被災並宣鎮歸化等廳次之並宣鎮廳
除去冬撥銀九萬兩先後委解會同該廳采購米糧一面先儘常
平倉穀七千餘石民捐谷五千餘石於上月在該廳城內及
隆盛莊張皋兒二道河等處分設四廠查放冬賑並設立恤

幼局收養十五歲以下幼孩現據陸續報買雜糧已有二萬五千餘石於正月初六日提前散放春撫一個月口糧擬二三月再放兩次並加放籽種一次甯遠廳前據稟請 用義倉谷石並分撥賑款本地捐錢一併買糧查現又撥給銀二萬三千兩 甯遠廳雜糧五千石委員分往該廳之天成村科布爾一帶設局散放仍分設粥廠拯濟貧民歸化廳除去久酌撥賑款並該廳就地捐銀一萬餘兩在於山前山後分設七廠就近買糧查放又綏遠廳庫借撥銀三萬兩購買雜糧一萬餘石預備春撫此外薩拉齊托克托城和林格爾清水河均由歸綏道分撥賑款暨本地捐項倉存穀石或設局收養或查戶散放久賑甫竣

即接春撫現據總辦委員錫良稟稱各廳災重地廣分十六路
隨查隨放綜計歸薩和托清五處小口折合大口共計災民五
千餘萬名口豐鎮定甯遠尚不在內除豐定甯二廳籌備賑款約
敷三個月口糧其歸化等五廳擬先放給一個月口糧計共需米
四萬七八千石現值雪澤普沾正可及時耕種擬再加半月
口糧作為籽種統於二月初一散放以後仍擬展放兩次此口
外各廳現辦春撫之大概情形也惟據稱所需糧價除已發賑
款銀二十五萬兩計尚不敷銀十萬兩之譜三月以後撫局恐
難遽撫加以各廳轄境週迴二千餘里向多客民聞賑續來在
所難免現查戶口亦擬據為定數為日方長需款甚鉅前接上

海善紳施善昌等來電以晉省災重議由該紳等籌銀五萬
兩津海關道墊銀五萬兩前來查放並直隸督臣李鴻章長
蘆運司等詳稱前項銀兩已由津局先行籌墊得此義賑不
無裨益茲復渥荷

天恩

頒發銀十萬兩俾資賑濟辦理可免支絀現准部咨奉撥銀兩已
由順天府委員領解應俟至日遵即督飭辦賑各員分別核
實勻給以期

皇仁

普被實惠均沾至此次賑糧就地采買已逾八萬餘石又據甯夏
買糧委員電函買就襍糧五萬餘石俟開河即行駛運約三月
初可抵包頭以後籌款贖購尚可源源接濟據賑捐局司道詳

請覆奏前來臣伏念晉省丁戊大疫以來元氣迄未盡復嗣經
汾水為灾工賑需款並歷年捐辦各省賑銀統計多至五六十
萬紳富捐輸勢成弩末現值該省北口外賑撫接運辦理頗非
容易苟蒙

恩賚俾得及時拯濟四濟歡騰現在渥沾雪澤東南各路宿麥已滋省
北各屬春麥可種民情已形安謐其有未盡事宜臣惟有殫竭
愚誠仰體

聖主痼痲在抱之意督率司道體察情形隨時補救以期上慰

宸廑除開辦賑捐查無浮派侵吞本省粗糧向無厘稅各節另片覆奏
外所有現辦冬春賑撫大概情形理合恭摺具陳

光緒十八年十一月歸綏道文請預辦春撫稟

敬稟者竊職道所屬七廳去年歉收今夏元旱貧民乏食有餓斃者有逃亡者有賣男鬻女者情形甚慘待哺孔殷幸蒙憲恩籌撥鉅款派令候補知府錫守良督同印委各員先儘倉谷兼買糧石撫卹貧民兩個月口糧遂使口外遺孑灾黎得有更生之慶但自本年五六月間得雨以後為時已遲且農民多有逃絕且有無牛具無籽粒不能補種者即有補種晚禾然而雨多禾苗尚嫩七月底八月初又連遭霜凍禾稼黃萎籽粒都空以致秋收甚歉甚或顆粒無收情形有與去年相仿者更有不及去年者且去年地皆全種雖歉收而尚有些糧今年地多未

種一歉收而更覺無糧是以現在秋收甫畢而糧價已至日日昂
貧民已至乏食刻下男婦沿街乞食子女登門求賣聞有將蕎
麥稻磨碎以充食者併有將馬糞淘洗以充食者情形可慘已
極除由職道詣飭各廳各就地方情形捐籌款項酌辦冬賑稍
資接濟外惟至來春青黃不接之際此等乏食貧民若不賑給
口糧勢必多成餓殍但各廳幅員遼濶戶口繁多所需賑款甚
鉅且本地糧缺價昂必須由省預為籌發鉅款先由甯甯夏購定
糧石俟來歲河北船粟而下則於來年賑撫口糧發給籽種方
能趕及至於辦理賑務尤須得人今年錫守督辦口外賑務款
不虛糜民沾實惠來春仍請派委錫守帶同各員前來督辦

以期駕輕就熟獎絕風清除咨藩司外理合由馬遞五百里而請
憲台查核俯賜由省籌發銀十餘萬兩如果一時難以撥解請
先由綏遠廳庫籌借銀數萬兩仍請由省撥解還欸以期迅速
而應急需其銀可否飭交駐紮包頭之管帶練軍步隊張副
將千功前赴甯夏密購糧石俟明春河運而來以便撥充賑糧賑
撫飢黎並飭委錫守前來督辦則邊氓幸甚職道同所屬各
廳亦幸甚感甚矣臨稟無任懇切特命之至再口外河開總在三
月節後糧纔運到彼時貧民固盼口糧農民尤急籽種應請飭
購新糧則百姓領回或作口糧或作籽種可以兩從其便若買年
久倉糧誠恐種而不生合併聲明

護理山西巡撫胡批來牘具悉本年道屬各廳成災極重本護院體察情形已與賑捐局司道籌商辦理先撥銀八千兩派委試用通判程世榮解赴該道衙門兌收酌發被災較重民情最苦之處儘數散給該道又諄飭各廳就地捐籌款項接濟冬賑自可無虞至來春青黃不接應需口糧籽種該道擬請發銀十餘萬兩委張副將千功前赴甘肅甯夏購糧開春河運來晉等情適與賑捐局司道所議符合昨已由司詳請札委該副將總辦並由該道庫撥交張副將銀二萬兩以備雇船定糧運腳之需另由司庫籌動銀八萬兩委員解存甯夏府庫以便隨時購糧提用暨委程倅世榮等分別會同幫辦各在案其一切未盡

事宜該道即就近與張副將等會商辦理總期事貴妥速款不
虛糜至請委錫守來春前往督辦屆時再行酌奪可也

光緒十八年十二月歸化城同知儒賑務稟

敬稟者竊卑職於冬月初間當將就地籌款辦理冬賑各情形
肅稟憲鑒在案惟是卑廳地方遼濶被災輕重飢民太多只得
儘所籌之谷救極貧之民旋即酌派員紳分設七廠隨查隨放
嗣因運腳經費苦無所出復由卑職倡捐擇請富商大賈苦口
勸募又得八百金之譜即以此款作為經費極力節省有餘仍
即購糧現仍設法搜求未便結報惟山後四廠距城約在二三
百里外核計運谷腳費需款不貲又因雪澤頻施道路阻滯腳

費尤鉅當與員紳熟籌變通幸山後各鎮糧價與歸化等擬
山後四廠計谷散錢飢民就近買食亦不吃虧而腳價可省十餘
串其山前道路較近腳價亦輕仍舊運谷散放如此變通辦理
可省糜費數百金即可多救數百命所最焦急者連年歉荒米
糧昂貴飢民愈眾等款益艱現據各廠員紳紛紛函報僉稱此
次所查飢民較夏間加倍不止前籌之谷仍恐不敷正在為難
適程倅世榮解送賑銀八千兩以資各廳冬賑隨即具稟請撥
蒙恩准撥銀三千兩又包鎮富商喬姓夏間捐麥一千石未及
散放變價存儲稟請憲台撥給復蒙准撥銀二千三百兩計兩
款五千三百兩按時估可買倉斗谷二千五六百石加以前籌

之谷三千石共得谷六千石之譜均勻散給稍可支持而明春
賑撫尤關緊要計甯夏購糧到此必須春暮維彼飢黎安能以
困餓之餘生待甯夏之賑米無如就地籌款羅掘已空目覩嗷
鴻安忍坐視籌思至再絕少良謀祇有仰懇憲恩迅撥款項俾
得就近採買以應急需但使飢民苟延殘生得以努力田畝
皆我憲口生成再造之恩也抑旱職更有請者刻下雪澤均沾應
是豐年預兆第念遍野災黎全恃種地度日既無餘糧以資生
焉有籽種以種地旱職於下鄉查災時紛紛跪求借給籽種目
覩情形寔堪憫惻若不預為籌畫則明春悞其播種即來秋
難卜收成可否仰懇憲恩籌撥款項購備籽種於明春散賑時酌

量借給俾飢民得以及時東作以期收效西成仍貴成甲會春借
秋還以期歸款如蒙俞允並求迅賜發款或由歸托蘆包厘
金項下就近撥給以便及時採買糧價尚平一到明春必形昂
貴不勝叩禱待命之至

是年春直隸設局勸捐委員來城辦理協賑江浙等省善集款
來城舉行義賑

直隸義賑委員褚教諭成焯

查放過歸化廳屬山後六廠貧民折實大口九萬一千一百十
二口半第一次每口滿錢四百文第二次每口滿錢二百文
共放過滿錢五萬四千六百六十七串五百文

又放過流民滿錢八百九十五串三百一十文

直隸義賑委員李郎中

士鈺

查放過歸化廳屬山前後八廠共貧民折寔大口十一萬四百二十五口半每口滿錢四百文共放過滿錢四萬四千一百七十七串二百文

直隸協賑委員劉觀察

啟彤

查放過歸化廳屬山前後四鄉貧民折寔大口七萬九千九百九口半每口放給滿錢四百文共放過滿錢三萬二千九百六十三串八百文

又放過流民滿錢五百八串四百五十文

謹按此次晉省口外七廳荒歉成灾情形較重鄰省協力賑濟除直隸協賑之數多至數十萬蘇浙兩省義賑銀十餘萬兩外他如 京都山東陝西湖北四川雲南甘肅各省官紳義士或自捐多金或募集鉅款或采運米糧或施送衣藥無不同心竭力以救災黎迨至賑畢猶存餘款十萬金預備積穀善後等事此固 諸君子拯災卹鄰之雅義亦寔由 張漢仙廉訪大聲疾呼之所致也然所捐之款比自為口外七廳而設故不備載捐數謹就在歸化境內查放者詳識於冊所以託厚德昭寔錄云

抄錄

諭旨

並直隸總督派員協賑情形各摺片

光緒十九年正月二十九日奉

上諭

據內閣學士譚彥彬御史王儼奏山西灾情甚重請飭籌撫運糧協賑核捐各摺片上年山西邊外七廳及大同等府被災較廣業由該省籌款賑撫現在青黃不接為日正長小民困苦情形寔堪軫念本日明降

諭旨

由戶部撥銀十萬兩交張煦核實散放至採運糧石全在商販流通所有兩省應收粗糧厘稅著李鴻章張煦通飭通屬一律停收遇有糧運過境飭即妥為護送以廣招徠李鴻章於萬全等縣被災地方已派員賑撫該處與山西境地毗連並著該督籌撥賑款

飭令派出之員就近在山西邊境協賑等因欽此二月 日直
隸總督李覆奏飭籌賑局司道電商南中義紳勸集捐款五
萬兩並由運司李邦禎借撥三萬兩海關道盛宣懷捐一萬兩派
委山東候補知縣潘民表又飭令在津採運大米一萬石續派
候補知州馮慶鏞解往邊外一帶賑濟並出示招商運米停
收厘稅嚴禁遏糴抬價等情俾得轉運流通

光緒十九年三月初九日奉

上諭

前因山西被災較重賞交部庫銀十萬兩賑濟旋據張煦覆奏冬
春賑撫購糧情形該省已發銀二十五萬米數萬石嗣後據徐桐
等奏捐米二萬石李鴻章奏陸續籌捐銀二千餘萬兩總計各

項銀米源源解往詔可稍資接濟惟聞該處災民眾多嗷嗷待哺為
日方長殊深軫念加恩著將湖南湖北本年應解正耗漕米六萬
五千餘石迅速核定變價同水脚運費等款一併核扣徑解天津交
李鴻章發交辦賑各員確查災區妥速散放毋得稍有弊混用
副軫念民艱有加無已至意該部知道欽此三月 日直隸總
督李派劉道啟彤携兩湖漕折運費等銀十四萬餘兩前來歸
化等處會督員紳籌辦賑卹

光緒十九年正月

長蘆鹽運司李邦禎
直隸洋海關道盛宣懷

籌款請辦義賑稟

敬稟者竊

本司
職道

疊接山西署藩司張汝梅函開本年夏間晉境

始患元暘田禾枯槁嗣經霪雨為災風雹叠遭補種雜糧均被

淹沒竟至四十餘州縣之多大同府屬以應州山陰懷仁為最
重朔平府屬以右玉朔州為最重關外七廳如歸化豐鎮等處
本係瘠苦兼之連年荒歉尤屬難堪以致賣男鬻女踵接于途
強壯者遠逃異鄉老弱者坐以待斃農民能日食一粥即稱富
户下此則抉草根剝樹皮苟延朝夕尤為可慘所歷各省見民
之困苦無有甚於此者更難在省外及關外數百里全是災區
不獨辦糧匪易即芻秣亦屬難籌勸捐弩末萬難濟急伏求轉
稟傳相惻隱為懷速賜籌集鉅款派員赴晉賑撫實為蒼生造
福等因又張家口同知朱璋達稟稱口外頻年歉收民無蓋藏
上年已食糠粃本年秋禾被霜災重且廣前數月皆以蕎花禾

梗以及草根樹皮煮食充飢現俱淨盡兼食馬糞所見之人哭
無淚而貌無聲雖壯夫不能行半里失跌即死沿途倒斃之人
無處茂有其與所屬昆連曲豆鎮歸化陽高等處灾情本重於
卑屬未聞辦賑入市林五年輕婦女價僅大錢一二吊文男孩見
有車過即擲於前逼令帶走否則壓死不顧懷安萬全等處之
西北一帶民情困苦幾與卑屬相等各處糧價早已三倍於前
目下尤復逐日增漲口外地極偏僻加以盜賊蜂起商販亦絕此
次新放錢文口外無糧可買民間仍少寔際尤不解者天心之慘
忽於近日大作嚴寒為從來所未有不知口外災民又凍斃
若干人矣查口外西路之民不得谷食已經年餘人鮮正氣再

食蕎花等物毒蘊於內寒傷於外即幸延過殘冬之交春令必起瘟疫卑職奉職無狀拯救無方對此飢民惟有日為流涕而已等情到局伏查本年灾情直隸口北一帶已較內地為重而朱丞璋達所稱與張家口毘連之豐鎮陽高歸化等處更重於所屬證之人言確係實在情形伏念中堂胞與天下救民之心不限方隅光緒三四年籌款鎖糧三晉之民得以生活無算現在順直各屬一賑再賑均已仰沐恩施邊地重災何忍獨令向

隅

本司職道

等擬欲仰體憲仁請為設法籌款以救邊民無如籌賑

局捐款不甚踴躍轉盼春賑及應辦之工需甚鉅而關外民窮食盡岌岌不可終日

本司職道

焦思再四寢饋不安當經電商上海

協賑公所施善昌等應允勸捐賑銀五萬兩日前請在招商局
捐存備賑十萬兩欸內暫行挪借准由施善昌等設法捐還並
請晉省發給實收照章請獎職道核與成案相符應請照准
本司並查運庫征存賑墊加價一欸原直隸災賑之用本不應
分撥他省惟晉邊災象奇重賑務刻不容緩擬請暫行借撥
銀三萬兩由壽賑局列作收放俟明春續收賑捐再行撥還又職
道擬籌捐銀二萬兩共措現銀十萬兩委派委員義紳即由張
家口出口直至晉省邊外並鎮陽高等處查明災重處所按照
義賑章程查戶散放總期辦理迅速以收實效如蒙憲台俯允
所請查有道員用分發補用知府盛昌頤四品銜直隸滄州知

州袁遂四品銜山東候補知州潘民表均屬放賑熟手不辭勞
瘁堪以札委即由天津帶同司事人等携款前往惟聞關外糧
食缺乏近邊年歲亦歉移粟甚難糧價奇昂則放錢比之內地
非多不可此次所籌之款杯水車薪祇能在直晉昆連災重數
處稍濟眉急以外被災之處甚多斷難徧及轉致在此失彼仍
應由晉省另行集款派人籌辦未可因茲小惠轉誤大局理合
具稟瀆陳伏乞憲台咨明山西巡撫綏遠城將軍歸化城副都
統飭知地方官凡該員等所到查賑之處隨時照料一面設法
互相揀核或可稍有轉機是否有當伏乞批示祇遵寔為德便

光緒十九年五月二十三日蒙撫憲張札開光緒十九年五月十七

日據直隸籌辦晉邊協賑局詳稱竊照晉省關外各廳旱災
極重待賑孔殷當經本司職道等遵飭先後籌撥銀米遴派
員紳分投前往災重之區查戶散放蒙 奏

派委用劉道前往會督員紳辦理嗣因災廣款少為日正長查一放
不敷甚鉅復籌解濟均經隨時詳報憲監各在案前奉爵閣
督憲札據奏派辦理晉邊賑務劉道啟形稟報到廳會督員紳
分查戶口安速放賑因口外向無麥秋五六月青黃不接之時若
不展賑一二次恐因死亡相繼等情形令田局續解等因奉此
自應遵照迅籌續解以資拯救茲有四川龍興藩司墊款滙解
捐銀六萬兩湖北善後局滙解到捐銀一萬兩施守則啟解到

捐銀一萬四千兩又借墊銀二萬兩謝紳家福解到捐銀五千兩鴻臚寺劉京卿捐銀一千兩蔭瑞堂捐銀一千兩浙江省借墊係茶捐撥普邊濟賑項下尚存銀一千一百三十六兩上海備賑借款項下尚存銀一萬四千三百八十兩各零戶捐銀一千四百八十兩共湊解銀十二萬八千兩遴選委員妥速解往先至豐鎮交明潘紳歸豐甯等處查放銀五萬五千兩再將下餘銀七萬三千兩由豐鎮起解赴歸化交劉道啟彤查放分撥諸紳等迅速散放以憑接濟並搭解施守捐正氣丸一萬服募捐救疫丹痧氣丸一萬服各半分給查有候選通判任敬和試用縣丞王國均堪以派委押解

是年秋歸化廳應徵銀根蠲免十分之五

皇化坊廟志

卷三

養濟院額收孤貧一百名

乾隆元年歸化城都統丹津同知永恆遵

旨設

立在歸化城西龍王廟路南係舊把總衙署營房三十餘間每孤

貧一名日給口糧米一倉升歲支倉石米三百五十餘石遇閏

按日加增每年秋冬之間人給布一疋給大炭三斤其大炭

自九月至次年二月為止所需米布炭價銀兩均由歸化

廳詳請

副都統從牲畜稅項下提發交鄉耆經營七月奉

上諭

各省郡縣州邑皆有養濟院以收養貧民此即古帝王哀矜

獨之意朕聞歸化城坐地接壤邊關人烟湊集其中多有疲癯殘疾

之人無棲身之所日則乞食街衢夜則露宿荒野甚可憫惻查
彼地舊有把總官房三十餘間可以改為收養貧民之所每年於
牛羊稅內播銀二三百兩粟米百餘石為饋粥寒衣之費着該處同
知通判揀選誠實鄉耆經理其事仍不時稽查以杜侵蝕之弊倘
地方有樂善好施者聽其捐助共成善舉但不得稍涉勉強着該
都統會同該同知通判妥貼辦理務令窮民均沾實惠特諭欽此
同治十一年恭錄刻匾敬懸三賢廟

光緒初年前歸綏道阿倡捐銀兩並罰欸發商生息設立育嬰
堂牛痘局濟生店諸善舉

抄錄原札

光緒五年三月奉

歸德道阿札照得本道前據寶豐社新總領長裕元郭敬堂
與舊總領義隆源渠朝海等因拈新總領兼涉估盤致控到道
經本道飭令該廳傳集渠朝海等訊明寶豐社總領散戶等均
有不遵禁令互作存空情事並舊總領渠朝海有朦朧控票新總
領郭敬堂有勾詞冒控各情本應嚴究惟據四鄉耆等再三懇
求免究寶豐社總領散戶等亦僉供自知悔罪情願認罰等語
本道查該寶豐社商民等既知悔罪自應准如所懇一概施恩
免究惟查歸化牛痘局育嬰堂濟生店等處經費不足前經本
道示蒙撫憲諭令督同該廳勸諭商民續行捐助又前奉綏遠

城將軍面諭以啟秀書院膏火經費不敷令即勸諭商民捐助
各等因今該寶豐社總領散戶等既願認罰令即捐助前項各
經費並由本道出示曉諭去後茲據該鄉總等公議以舊總領
渠朝海朦朧捏稟新總領郭敬堂刁詞冒控各罰捐銀四百兩
其餘各散戶三十餘家不遵禁令互作存空均有不合每家願
各捐銀二百六十六兩七錢統共捐銀一萬一兩一錢五分呈
交到轅當經本道督同該廳將捐銀當堂收訖除遵奉將軍
諭飭于所捐銀內提出銀四千兩備充啟秀書院膏火經費飭令
鄉總等覈文呈交將軍衙門投收外合亟將餘剩銀六千一兩
一錢五分儘數札發札到該廳立即遵照將發去續捐銀兩查

收彙會前舉善舉經費銀兩一併轉發各商生息仍將收到銀
數及如何發商具領生息緣由彙復本道查考一面將原續捐
項生息收支各款逐細開具清摺按月申送以憑查核

光緒五年閏三月奉

歸綏道阿札崇查前寶豐社新拈總領長裕元郭敬堂上控舊
總領義隆源梁朝海控詞朦稟違規另拈並牽控梁朝海有
勾引外來客商擾害本地街市各等情到道當經飭令該廳傳
集帶轅督訊明該寶豐社新舊總領及各散户均應不合本廳究
懲惟據四鄉耆十四社總領再四懇求一概施恩免究並據寶
豐社總領散户等自知悔罪情願認罰續捐銀一萬一兩一錢

五分當經本道俯允所請以資辦公除遵奉將軍面諭於所捐銀兩內出銀四千兩解交將軍衙門備充綏遠城啟秀書院膏火經費外餘銀六千一兩一錢五分如數發交該廳連前存息本共銀一萬四千餘兩一併發給鄉耆承領轉發各商按分生息前已將條細情形札行該廳各在案查充在所增息本所有歲入息錢稍覺充裕應分作牛痘局施種牛痘育嬰堂收養嬰孩濟生店每年冬春收養貧民及冬春另包空店以恤窮寒僱人收檢字紙以免穢亂各善舉經費每年樽節動用祇准按其息錢數目量入為出斷不准絲毫動及息本嗣後無論地方何項公用一概不准借動此項息本銀兩倘有官員紳商鄉耆

總領及司事書役人等私行侵用此項息本准其勿論何人隨時稟請大憲查追歸款按例究辦庶經費不至短絀善舉可垂永久所有牛痘局育嬰堂濟生店等處各善舉現既經費稍充自應酌定章程條款出示曉諭並將原續捐助姓名銀數及設立各善舉緣由刊刻總碑峙立義學另將各善舉各條款分別刊勒臥碑嵌立各該公所牆上以期俾眾週知永遠勿替

是月蒙撫憲曾札開據歸綏道阿克達春稟現據歸化寶豐社商民續捐善舉經費等銀兩並擬定牛痘局等處條款章程等情到院據此查該道前因歸化廳牛痘局等處經費所收息銀不敷應用本應遵照面稟續行勸捐因寶豐社總領散戶等違禁

互作估盤又復捏詞朦朧稟經該道督同該廳訊明該商民等自知悔罪願罰捐銀一萬一兩一錢五分充作地方善舉經費當將所罰捐銀以四千兩呈交將軍衙門備充啟秀書院膏火下餘六千餘兩發交歸廳連前存生息共銀一萬四十一兩一錢六分一併發商生息將息銀作為牛痘局育嬰堂濟生店等處經費查核所議各章程俱屬妥協均應如稟辦理惟既經議定章程務須督率該廳認真籌辦以垂久遠毋任日久弊生致有名無寔虛糜經費是為至要

光緒八年二月蒙撫憲張批據本道詳報續添善舉經費息本並添設義學以興教化一案緣由查該道所屬各廳地處口外民

皆流寓向來學校考試兩項格於成例自以廣設義學教民讀書明理最為急務前經該道捐集銀兩就楊家巷義學葺其修建增廣並創設牛痘局育嬰堂等項善舉種種設定為因地制宜起見殊堪嘉尚據詳在於善舉公費歲入息銀內提出銀五百兩湊入公費本銀共一萬四千兩之數發商生息嗣後於無論地方何項急需概不准藉端提用以免虧挪應准如詳立案

光緒十年九月署巡撫奎元奏再據歸綏道阿克達春詳稱歸化地方舊有義學二處濟生院一所因經費支絀年久廢弛不足以訓養童蒙收留貧丐該道首先倡捐銀五百兩並所屬各廳

同通佐雜紳耆以及寶豐社錢商等均各踴躍捐助前後共捐
集銀二萬一千二十八兩零當就楊家巷義學舊基添買隙地
重加修建凡崇祀

先師賢儒之所延師課徒之齋字爐庖湊無不俱備又於城內四
隅資賃廟房分設義冢四處又於道署西偏公所舊地修蓋房
院設牛痘局施種牛痘設育嬰堂收哺棄嬰又于乃莫氣召
前濟生院舊基添置餘地重建房屋每年冬令留養貧民又
另設官店樓止年壯丐民統計各項工程雜費共用銀四千二
百二十兩又提銀四千兩解充綏遠啟秀書院膏火息本項下
餘銀一萬二千八百餘兩並於連年此項存餘息銀內提動共

奏成息本銀一萬四千兩飭令歸化廳發商按同一分生息以歲
息銀分作各義學牛痘局育嬰堂濟生院等處經費之用以
上各善舉事務紛繁專設司事二人月給薪水令其經營其收
支經費由鄉耆公同管理不假官吏之手每屆年終由歸化廳
造報該道查核等情詳請具

奏

立案前來查歸化城地方遼濶民蒙雜居近年生齒日繁教養
為當務所急該道阿克達春心存利濟倡捐廉率同僚屬紳
商共集鉅資分設善舉並於興作各工勻解綏遠城書院膏
火息本之外仍節存銀一萬四千兩發商生息源源濟用以為
經久之圖洵足以振興教化輔養民生合無仰懇

天恩

俯准立案嗣後無論地方何項公用概不准其提動以杜流弊而
垂永久再此項善舉保田官商捐辦應令按年造冊送臣衙門
稽考毋庸送部核銷以省繁牘理合附片具奏

捐助善舉經費姓名

歸綏阿道倡捐銀五百兩

歸化城同知常桂倡捐銀二百兩

代理歸化城同知候補知府玉吉捐銀一百兩

西征糧台委員陝西候補直隸州知州陳瑞芝捐銀三十七兩

六錢五分

寶豐錢社總領王清選等三十八家共罰捐銀八千四百兩

天義德捐銀一千兩

福泉驛店捐制錢四百三十七千

按時估合銀二百三十一兩二錢一分六厘

以上共捐銀一萬四百六十八兩八錢六分六厘光緒二年

書捐

托克托城通判常榮捐銀一百五十兩

准補長治縣知縣侯承熙捐銀三十兩

浙江候選布經歷孫錫祺捐銀一百兩

浙江副貢沈琛捐銀三十兩

代理歸化巡檢于繼鐔捐銀三十兩

浙江監生章廷監捐銀二十兩

歸化舊鄉耆李世昌等捐銀四十兩

歸化值年鄉耆周興業等捐銀一百兩

以上共銀五百兩光緒四年續捐

薩拉齊同知文山捐銀一百五十兩

代理包頭巡檢戴鴻翥捐銀四十兩

歸化城巡檢王樹榮捐銀七十兩

畢齊克齊巡檢李鳴和捐銀五十兩

托克托城巡檢鄭塗捐銀五十兩

薩拉齊巡檢姚桐書捐銀三十兩

包頭巡檢崔際平捐銀七十兩

寶豐社續捐銀六千一兩一錢五分

以上共銀六千四百六十一兩一錢五分光緒五年續捐

光緒三年捐款銀一萬四百六十八兩八錢六分六厘內

除修理城隍廟義學濟生店各堆子房創建育嬰堂牛痘局六處工程共用銀四千二百六十四兩九錢七分三厘

餘銀湊足六千六百兩發商按月一分行息

光緒四年續捐銀五百兩

光緒五年續捐銀六千四百六十一兩一錢五分以六千四百兩整數發商生息

光緒八年提出餘積息銀五百兩發商生息

光緒九年提出餘贖息銀一千兩發商生息

以上統共息本銀一萬五千兩發商按月一分行息以作育
嬰堂牛痘局濟生院等各項善舉歲需經費

光緒十九年十二月奉

歸綏道文札案查前准口外各廳春撫事宜局候補知府錫守
良詳稱案蒙奏派辦理晉邊賑務北洋委用道劉咨開案准貴
總辦轉據顧紳文翰面商歸化濟生院義地各善舉亟需添
置房屋地畝擬於協賑餘贖款內酌撥銀兩辦理並經貴總辦
商派沈司獄守正幫同照料等因准此查有朔平協賑局詳開餘
贖銀三千五百三十兩合規銀三千八百六十八兩八錢八分

應即移交貴局以為此項善舉之用相應備文咨解為此合
咨諸煩查照將前項銀三千八百六十八兩八錢八分照數充收
發交該員紳核實辦理出具印收見復望切施行計咨解庫平
銀三千五百三十兩申合規銀三千八百六十八兩八錢八分等
因蒙此卑局遵將奉發銀兩照數轉解本道衙門伏乞俯賜
札飭沈司獄守正會同天津顧善士文翰承領核實妥辦以期
整頓善舉實為公便除徑詳撫憲暨賑捐局憲並出具印收詳
覆劉道憲外為此備由具申呈乞照詳施行並轉解原庫平銀
三千五百三十兩等因到道准此本道查歸化善舉內濟生院
每年春冬二季收養貧民雖以五百名為額而有時貧民較多

燒

麾之不去時或多至六七百名不等該濟生院原來房屋窄小
近亦年久破爛收人既多擁擠太甚夜間只能擠束而坐不能
舒展而睡且于小屋之內安設大鍋一口每日煮粥兩次粥鍋
濕熱之氣與窮人穢濁之氣濃厚蒸騰致稽查善舉者不
敢進屋監視煮粥况貧民等久住屋內本難安眠之常受濕熱穢濁
之氣最易生病且易傳染及到春暖病發多在膿濕疥瘡致屢
年病死者甚多收生而致死殊令心抱不安今既承奉派辦理
晉邊賑務北洋委用道劉撥給賑解銀款使濟生院義地等善
舉應用自應將濟生院拓購地基添蓋房屋務使所收貧民
均能應問臥睡并于住人屋內酌添薪炭另晚暖坑而將煮粥之

鍋另屋安設免致濕熱與穢氣交蒸庶員紳亦得監視放溺而
貧民亦少瘡病致斃至於義地亦應添買乾燥寬敞之地諭令
凡有倒斃無主之屍止准予隆冬地凍屍難掩埋之時暫將屍
送入瘞骨所以免狼犬刨出殘食及到清明節仍將瘞骨所內
一冬積攢之屍逐一起出妥為掩埋不准仍前火化其春夏秋
季地尚未凍屍能掩埋之時務令保長將倒斃之屍當即送
入義墳掘坑深埋不准貪圖省便撩入瘞骨所內以致屍身腐化
附近穢氣薰蒸於死者既極慘傷于民亦易致疫癘當經本道
即將此項銀三千五百三十兩發交顧紳文翰沈委員守正承領
飭將濟生院西邊添買破院地基三處與濟生院原來破房一

併拆蓋共蓋後院貧民住房十七間前院貧民住房煮粥鍋房
及經管店務人住處兼委員等坐落共房十七間均已房皆蓋
好坑亦燒乾已於十月朔日收入居住現已收養貧民四百八
十餘名惟大門一所坐落東南今年既方向不宜且土凍亦修
蓋不及應俟來春找修完工又在歸化城西南隅添買義地一
塊計長六十五丈寬五十五丈現已埋立石樁掩起圪楞令運
神廟僧就近照管以作掩埋無主死屍男女各義墳所有濟生
院添買隣院地基及修蓋兩院房屋暨添買義地統共用過
銀一千七百三十兩尚存市錢一百五十六吊留作來春找修大
門工費之用現已飭發歸廳查收轉發值年鄉耆等發商長年

每年收養貧民屋內既不設粥鍋另燒暖炕應添薪炭並專顧
要人經營院務應添工食及羨項各新添經費之用年終統由
歸廳歸入前項善舉案內報銷所有濟生院建善房屋用過
工料各總數容俟工竣開單報查仍請免其造冊報銷除詳檄憲
並咨藩司賑捐局外合亟札飭札到該廳立即遵照將發去銀
一千八百兩發交值年鄉耆分發各社或專發寶豐社均令長
年一分生息所生息銀專歸濟生院作每年收羨負民加增
各屋燒炕薪炭並添設總管院務人工食各經費之用定以來年
正月初一日起息並將發商生息日期通報查考

牛痘局章程

本局延種牛痘之人應按年隨時施種除定係盛夏炎熱及
隆冬嚴寒暫行停種外其餘寒煖適中之時應由司種者定期
引種每年酌定薪水等項統共城平銀一百六十八兩按季致
送此外並無別項應付

一小孩百日後以及數歲十數歲者不論男女均可引種惟有病
者不種俟病愈按期來局引種

一種痘必須先期掛號領票至日來局聽候按名先後點種至携
抱小孩之男婦應分內外兩處等候毋許混種

一種時必須待將漿晾乾方可穿衣免致擦去將水痘或不出種畢
給與宜忌單一紙勿令誤食發物致生他虞

一種後以八日為期來局還漿由局給小孩果資制錢一百文令原種痘之人看視挑漿放毒自無再出天花之慮切不可令人妄為挑漿恐不得其法轉貽後患

一引種日期如遇天氣乍寒恐小孩袒臂着涼酌定每年由局預備木炭一百觔交司種牛痘者隨時熬火以辟寒氣

一種痘及還漿來局無論地方遠近以所定之日已刻為準過時則種痘還漿均有不便故不可遲

一司種牛痘者應用薪水等項均有捐助公項息銀發給凡來種痘者無論貧富毋庸花費分文倘局中有人勒索准其來
轉稟究

一本局自冬夏停種以後下屆開局施種恐痘漿不能接續或乾
漿引種不出應由司種者專人赴省城牛痘局調取新漿並由
歸廳發給專馬俾利遄旋勿誤開種每次專人來往盤州酌給
城平八兩

一凡種痘之孩如不還漿恐誤接種應令育嬰堂之看堂人於
司種之期先一日前往上次點種各家催令次早來局還漿以
便引種至期仍令看堂人在局伺候照料倘有還漿不到者
着看堂人再行往催每催漿伺候一次由局給看堂人飯錢制
錢二百文

以上十餘所需銀錢係由閩郡官商公捐銀兩生息項下支發

應按年由歸廳造冊詳細報銷

育嬰堂章程十二條

一本堂收養嬰孩產覓乳婦並該乳婦等哺養嬰孩能否用心是
否足食必須隨時認真稽查至支放錢米孩衣等件亦須得人
經理擬擇司事二人專司其事並兼於每年冬季濟生店收養
貧民之時逐日輪流到店稽查煮粥有無偷減人數有無浮冒
看店之人有無需索各情弊惟該司事等不便令其枵腹從公
每人每月酌給薪水銀各八兩俾得在堂悉心妥辦

一本堂收養頭女孩號簿照牌並牛痘局號簿條示以及支放糧米
布疋出入銀錢等賬均應隨時登記擬由道廳各派禮書一名

專管兩處書寫事件每人每月酌給工食銀各二兩以示體恤
而免懈怠至本堂及牛痘局支領款項應由司事司種者具明
歸廳飭知值年鄉耆轉交司事等照章發給概不准假禮戶
書之手致滋弊竇

一看堂人一名着派接收嬰孩尋覓乳婦並逐日照管本堂夜閉
門戶及洒掃奔走差使每月酌給工食制錢二千文又每逢牛
痘局引種日期及先期一日均飭看堂人前往牛痘局聽候
差遣催辦等事應由該局另外加給飯錢

一本堂因恐初生嬰孩其父母不願自為哺育或有溺弊情事
是以准其送堂代為乳撫若是幼孩已經其父母存養二年即

無溺斃之虞本堂限于經費未便濫收倘係瞽目殘疾之孩仍
准隨時送堂收養

一本堂所收嬰孩雇住用乳婦必須移住堂內每名每月給工錢制
錢一千二百文燈油煤炭制錢八百文每日給谷米一斛有能兼
哺兩孩者另加工錢一分如嬰孩至三歲以上無須乳哺應另
雇老嫗撫養一嫗着撫兩孩亦月給工錢制錢一千二百文燈
油煤炭制錢八百文日給谷米一斛其三歲以上小孩亦每
名日給谷米十二兩如一嫗能兼顧三四孩者亦另加工錢一
分

一本堂乳婦老嫗哺撫嬰孩或有乳食不足及剋扣口糧以致嬰

孩餓瘦並有漠不關心甚至加以凌虐者一經查出立將該乳婦或老嫗逐出堂外不准逗遛所有嬰孩另僱安人哺撫至堂內原僱乳婦老嫗雖無前項情弊而所哺所撫嬰孩或有病斃經人抱領抑或長至及歲無須哺撫除分別情由酌賞錢文聊以示恤外仍應令其出堂不准托故閑住

一嬰孩未滿週歲者每年給以棉衣一件單衣一件棉袴一條已過週歲者每年給以棉衣一件單衣一件棉袴一條棉小被子一張均由本堂制給至三歲以上每年加給鞋襪錢制錢八百文令該撫養之嫗代制給穿以上所給衣袴應扣足一年方准

再領

一嬰孩如有出花患病等事令乳婦嫗隨時體察轉知司事撥
撥醫醫為如有病斃死者由本堂購給木匣一具並給掘坑人工
制錢一百文

一本堂所收嬰孩准外人隨時抱領作為義子義女或童養媳
但須司事者查明來領之人實係良家取具的保保其日後不
致有為匪轉賣情事方准領去倘有向保領者勒索分文准
其喊究如查非良家或無保人仍不准領

一本堂所收嬰孩養至十歲以上本堂限于經費碍難再為撫養
應由聽飭令值年鄉耆等妥為安置俾免失所倘有寔係殘廢
篤疾難自謀生者亦無須老嫗撫育應由本堂按照每日一斤

口糧另行發給着看堂人照管俟至十六歲以外歸本城養濟院棲止

一本堂如值收養嬰孩較內堂內乳婦不能兼哺或有外間乳婦愿哺本堂嬰孩而伊家有翁姑難以在堂居住者亦准將嬰孩抱出乳哺須一月將嬰孩抱入堂內查驗一次每月只給工食制錢一千二百文其餘煤炭燈油口糧谷米一概不給惟孩衣等件仍照堂內一體給領至孩子長到三歲以上即應收入堂內添給口糧等項歸老嫗兼撫其原在外哺孩之婦另酌給制錢一千文以獎其勞

一如有赤貧之家所生嬰孩不肯送堂者於孕婦未產先准其

親族報堂領票俟產生嬰孩存活三日後再持票報堂查明屬
寔准給制錢五百文彌月後抱堂查驗一次給制錢一千文百日
後復抱驗一次再給制錢五百文嬰孩已過百日應無再忍
溺斃者可將照票撤銷倘有寔係一貧如洗其母性賴女紅以
自存活恐哺嬰孩致妨生計因而不愿存育者亦惟報明本堂
聽候司事人確查赤貧屬寔並無捏冒情弊准予百日繳銷
照票後換給本堂憑摺一扣每月將嬰孩抱堂查驗一次憑
摺給領制錢六百文令其母自行哺育稍資津貼候嬰孩已
週兩歲再行停止將憑摺繳銷

以上十二條所需銀係由閭郡官商公捐銀兩生息項下支

發應按年由歸廳造冊詳細報銷

濟生院章程

一本城向設濟生院收養貧民洵為善舉惟必須經理得人方可
久行無弊擬自本年為始責成三賢廟鄉耆按年經營濟生
院經費並責成濟生院院主鄭元將逐日收留貧民數目及籍
貫姓名開註簿內送交鄉耆查驗明確發給米麩燈油柴火等
項錢仍由鄉耆將發給過各項錢數按月按日詳細算明確數
于事畢後開摺分報廳查考倘店主有徇私舞弊情事即
由鄉耆稟請責逐另雇安人承辦倘鄉耆虛應故事並不實
心經理一經查出即予懲儆

一濟生院收養貧民自本年為始定於九月二十日收養起至來春二月底止凡屬老幼殘廢無所依靠之人無論何處人民儘先收養入店其餘壯年貧民不准收留如果收養老幼殘廢之外店中尚有容人之處遇有人係壯年而病不聊生者亦准暫時收留一俟病愈即行開除出店勿任久留

一濟生院收養貧民內遇有寔係病不起炕者准院主報明鄉耆轉報歸廳飭官醫生前往調治應用葯資由鄉耆核實酌給倘有病故在院者由院主報明鄉耆轉報歸廳駁明辦理不准將死屍移往別處並不准效此地小店惡習病人尚未斷氣先行移出門外倘敢故違定行查究

一濟生院本年添置新房兩間連舊房共有九間現在收養貧民總以九間房屋無可容身而止俟日後添蓋房間再廣為收養

一濟生院收養貧民向規每名每日給市斗小米二合五勺現在仍照向規發給

一濟生院內向用火夫現在用火夫連院主共四名每名每日給滿錢六十文

一濟生院內向給燈油錢文現在四處燈油每日給一觔

一濟生院內向給柴火錢文現在四處柴火每日給滿錢八百文

一濟生院內向設煤爐現在共設煤爐四個每日共給煤五十觔

一濟生院內向用被面攪和粥內現在每日發給被面五觔

謹按善舉案內除育嬰堂牛痘局濟生院三項外尚有四義
學惜字紙立義地等事因義學惜字應附學校義地應附
陟墓故不備錄

皇
仁
土
成
心
之
三

歸化城廳志卷之六

田賦 附戶口

田賦昉於禹貢田辨泥塗墳壤墾墾之性賦則從田有錯有
貞五十而貢法至良也塞北窮荒古稱不毛逮我

朝定鼎拓土開疆雁磧龍沙盡從墾熟然土瘠鹵而民寄居畝收
恒歎民易流亡故科則視腹裏為輕而徵收歲有逋欠古人
云撫字心勞催科政拙誠謂是歟大禋以後勘明荒地租額
暫行停徵司事者苟能悉心體察權緩急而酌行之庶乎加
派革侵牟杜敲朴首民生不困而正供無闕矣是在良有司
加之意哉志田賦

渾津黑河二里民地原墾二百八十一頃四十六畝四分四厘每
畝徵米一升共米二百八十一石四斗六升四合四勺每畝徵
草折銀九厘共銀二百五十三兩三錢一分七厘九毫六絲乾
隆二十六年改章定為每草折銀一分徵米八合二頃共徵米
四百八十四石一斗一升八合九勺光緒九年又改米一石折
徵庫平銀一兩六錢共實徵銀七十七兩四錢九分二毫
四絲

大青山後牧地乾隆六十年開墾四千二百三十頃每畝徵銀二
分一厘五毫共額徵銀九千九十四兩五錢嘉慶四年豁免民
人棄地九百三十頃租銀一千九百九十九兩五錢後招民認

墾五百三十頃應銀一千一百三十九兩五錢十二年續墾地
二千七百二十五頃應銀五千八百五十八兩七錢五分道光
六年豁免水冲沙壓地八十七頃九十七畝四分九厘租銀一
百八十九兩一錢四分六厘除外額徵地六千四百六十七頃
二畝五分共徵銀一萬三千九百四兩一錢四厘光緒二十年
撫憲檄飭同知方龍光會同委員唐洪謨勘明災後荒地三千
八十四頃七十七畝一分應徵租銀六千六百三十二兩二錢
五分七厘六毫五絲暫行停徵現在熟地三千三百八十二頃
二十五畝四分共實徵銀七千二百七十一兩八錢四分六厘
一毫

大青山後四折空間牧地嘉慶七年撥補莊頭開墾七百六十六
頃五十二畝六分五厘每畝征銀二分一厘五毫共合銀一千
六百四十八兩三分二厘光緒二十年 撫憲檄飭同知方龍
光會同委員唐洪漢勘明災後荒地三百零九頃二十畝八分
二毫應合銀六百六十四兩七錢九分七厘三毫暫行停徵現
在熟地共四百五十七頃三十一畝八分四厘共徵銀九百八
十三兩二錢三分四厘八毫

額外經徵十五溝地九十七頃一畝一分三毫每畝徵米二升九
合六勺共徵租米二百八十七石一斗五升二合六勺五抄光
緒九年改為米一石折庫平銀一兩六錢現在共定征銀四百

五十九兩四錢四厘

額外代徵土默特牧地一百七十五頃九十九畝五分每畝征銀
一分七厘至二三四五分不等共額征銀五百二十二兩六錢
五分咸豐六年因災豁免地十頃五十畝共銀三十一兩五錢
現在共熟地一百六十五頃四十九畝五分共征銀四百九十
一兩一錢五分

以上五項均解綏遠城糧餉廳

代徵大青山後沙拉穆楞等十八村地租道光二十九年升科認
墾地五百九十二頃二十一畝四分每畝征租銀三分一厘八
絲共額征租銀一千八百四十二兩二錢九分一厘

代徵大青山後聚寶莊等二十七村地租道光三十年認墾地一
千一百五十九頃一十一畝四分每畝租銀三分一厘八絲額
徵租銀三千六百二兩五錢七分六厘三毫咸豐九年除大荒
地外實租地二千二畝七畝七分減輕租額每畝徵銀二分一
厘五毫現在共額徵租銀二千一百五十四兩四錢六分六厘
以上二項共徵銀三千九百九十四兩七錢五分七厘係解

副都統衙門

代徵吳公壩共地五十一頃三畝每畝徵銀一分共徵銀五十一
兩三分

代徵鰥寡孤獨共地五十八頃九十二畝每畝徵銀二厘五毫至

四五六分及一錢六分不等共徵銀七十四兩一分三厘

以上二項共銀一百二十五兩四分三厘係解副都統衙門

代徵察哈爾鑲藍旗牧地五十四頃九十七畝三分九厘每畝徵

銀一分七厘至三分不等共額徵銀九十兩七錢八厘

代徵土謝圖漢旗塔布齊一作討不氣牧地一十五頃八十三畝每畝

徵銀二錢及一分八厘至二三四分不等共額徵租銀二百一

兩二錢三分

以上二項該旗差員自行領取

外徵入官房地租銀九百九十一兩六錢九分除存留發給蒙古

地主銀一百三十四兩三錢二分外由藩司掛號均解經遠城

糧餉廳

外徵牙稅銀二十五兩二錢全解藩庫

綏遠城同知經徵渾津黑河十三戶莊頭地乾隆三年原奏准

歸化城十三莊墾地二千六百餘頃除一千九百餘頃交地方

官募民耕種輸租戶部外每莊頭各給地六十頃有零共地七

百八十五頃二十四畝七厘九毫八絲四忽嘉慶十四年題准

十三莊頭應交本色米二千六百十六石八斗七合八勺是年

豁免贖壞地一百八十五頃九十九畝七分花班生贖地一百

三十三頃一十四畝淤河佔地一百一十五頃一十三畝九

分十六年題准復銀被水淤佔地五十一頃三十八畝三分自

本年起升科道光五年題准復墾被水淤漫地一十五頃七十
畝自本年起升科見在地四百一十七頃九十二畝七分七厘
九毫八絲四忽每畝應徵米三升三合三勺三抄共額徵米一
千三百九十二石九斗五升三合三勺五抄二撮留儲廳庫充
饗

計開

渾津莊頭王文魁劉金鍾宋得勝吳永茂杜萬山劉佩潘世福
趙玉剛王成張承業等十戶共地六百頃八十畝四分二毫
八絲四忽地分十圈東西相距十五里南北相距七里零後
奉部豁免地三百三十九頃十三畝三分現實種地三百六

十一頃六十七畝一分三毫八絲四忽共徵米八百七十二石一斗四升九合五勺五抄二撮

黑河莊頭丁開山胡建基李自明等三戶共地一百八十四頃四十三畝六分七厘六毫地分三圈東至茂盛營西至達賴莊南至道北至渠後奉部豁免地二十八頃一十八畝現實種地一百五十六頃二十五畝六錢七厘六毫共徵米五百二十石八斗三合八勺

錄奏章詳稟

咸豐九年綏遠將軍成 奏大青山後沙拉穆楞招西聚寶莊等村地戶時有逃止又賦額過重屢多積欠擬請酌減以紓民

力而期經久十月十七日奉

上諭前據綏遠城將軍成凱奏請酌減太青山後牧地租銀當交
戶部議奏茲據奏稱太青山後沙拉穆楞等處地畝疏薄原之
租額過重以致地戶逃棄租銀拖欠請照該將軍等所議將租
額酌減等語所有太青山後牧廠租銀著照議減為每畝徵銀
二分一厘五毫以紓民力經此次議減之後務須年清年款其
舊欠租銀應如何分年帶徵之處著該將軍等體察情形報部
核辦從前經徵官員雖無侵挪情弊究屬催徵不力著查取職
名交部議處此後經徵各員儘敢仍前玩泄即著照大同朔平
二府徵收糧石例議處餘議欽此

光緒十九年御史褚成博奏請山西口外七廳賑務已畢宜飭辦積穀並嚴禁糧差擾民內有大青山地界邊遠蒙漢雜處地方官罕涉其境一切錢糧專歸糧差甲首收每銀一兩竟有浮索至五倍之多人因逃賦地漸荒蕪此次災重異常而義賑諸紳目擊糧差尚有持票催科之事鄉愚飲恨控訴無由此尤撓法病民之甚者也等語奉

上諭御史褚成博奏山西口外七廳賑務已畢請飭辦積穀並嚴禁收糧積弊一摺據稱該省賑事完竣尚多餘款請酌提銀兩作為收買積谷之用由官發給章程責成公正紳耆實心經理大青山後一帶錢糧向歸糧差甲首徵收每多浮索情弊亟應

禁革等語着張煦按照所陳各節體察情形妥籌辦理原摺着
鈔給閱看將此諭令知之欽此

光緒十二年同知方龍光稟敬稟者現蒙憲台案行奉准戶
部咨本部會奏山西省豐鎮等廳經徵各項地租拖欠頗仍
漫無考成擬請改照地丁錢糧例辦理一摺奉

旨依議欽此計鈔原奏內開豐甯兩廳經徵各項地租歸化廳經
徵太青山兩項地租擬請光緒十一年分將經徵接徵督催接
催各員統照地丁錢糧例辦理考成既嚴於該省地租當有裨益
等因咨行到卑廳等蒙此仰見大部嚴定考成策勵催科之至
意但口外各廳經徵租銀實有不能照地丁錢糧辦理者前經七

廳會銜懇陳情形兩次詳稟均蒙前升憲台分別詳咨已在案
茲奉前因合將各項租銀難照地丁實在情形再為憲台詳晰
陳之緣口外天氣極寒開凍遲而預霜早每年莊稼只收一季
每畝豐收不過數斗故口裏徵收地丁例分上下兩忙而口外
徵收租銀只能秋後開徵此就天時而論不能照地丁錢糧例
辦理者也口外古稱沙漠地皆沙磧居多而且地廣人稀無從
得糞以沙地而無糞培耕種久則地力乏往往種而不生必須
歇一二年後始種一年方能收穫此即周禮所謂一易再易之
地故種地者以多為貴往往今年歇此而種彼明年又歇彼而
種此地既不能全種糧必責令全完亦恐負民力有未逮此就

地利而論不能照地丁錢糧例辦理者也。口裏糧戶編定入籍
民不能輕棄其地官亦易進比其糧而口外糧戶盡是客民未
編戶籍有利則認糧而種地無利即棄地而之他況民人出口
種地例皆春出秋歸卑廳等年年冊報有案設其人秋歸而春
不復出則此一年中地即成無主之地糧亦為無着之糧即抵
死比催亦誰為完納此就人事而論不能照地丁錢糧例辦理
者也。總而言之天既苦寒地多沙瘠民非土著最易逋逃從前
定例處分從寬地方官尚得寓撫字於催科之中地或有歇年
而不種者人或秋歸而不出者其尾欠之糧尚可通融稍寬
迨比故糧戶尚敢復出種地不致棄地終逃雖糧多拖欠未嘗

全完而今年或此完而彼欠明年又此欠而彼完每年互相勾牽多者總能徵完九分以上少者亦必徵足七八分若一照地丁錢糧在大部以為考成既嚴當于地租有益果能於

國賦有益即官惟降謫民困敲朴亦可不恤殊不知以輕於去就之糧戶種無足戀惜之糧地追呼一迫即輕地而逃故處分愈重則催科愈嚴而逃亡之戶亦愈多缺額之糧尤愈甚徒使官民交受其害實於租賦非徒無益試就已然之事論之清廳原額徵銀二萬九千餘兩若處分稍寬即每年僅徵七八分亦能徵銀二萬餘兩乃自改照地丁錢糧例辦理以致戶逃地荒無敢認墾現在只贖額徵米四千二百餘石在彼當年加重處分未

嘗不以為於事有益詎知欲益反損實為前車之鑒竊慮著體
察地方糧戶各情形深知經徵各項租銀斷難仿照地丁辦理
惟豐甯二廳經徵各項租銀若竟漫無考成亦殊非慎重催科
之道卑職等會同等商除歸化廳經徵大青山兩項租銀向照
江蘇米石例辦理者均請仍循舊例另案題銷免其更改外所
有豐甯二廳向無考成之各項地租擬請自光緒十一年分起
一律改照江蘇米石例另案題銷分別完欠數目經督各官初
參復參辦理以嚴考核而重催徵至於奏銷限期口外氣候較
遲開徵亦晚其向例次年年底題銷者亦請仍照舊例按限題
銷所有卑職等查明各項租銀改照地丁諸多窒礙懇請改照

江蘇米石例辦理緣由是否有當理合會銜稟請大人鑒核

光緒二十年同知方龍光委員唐洪謨為會詳查清糧地革除糧
差事前奉憲檄行知以奉

旨飭下嚴飭地方官將糧差弊端實力禁革凡民間應完錢糧皆
令自封投櫃不准糧差包收等因行知到廳因歸化向無額設
田房稅契民間買賣糧地多不過割糧名率皆頂名認糧承種
往往地畝已更數主而糧簿仍只原名歷年既久轉轄不清非積
年承催之糧差均不能確知底細即無從催徵錢糧將欲革除
糧差之弊必先查糧地過撥的名使徵糧確有把握糧差纔能
革除當經滙陳情形稟蒙憲鑒於去年十一月間委令洪謨馳抵

歸化會同龍光安速遵辦稟請覆奏等因當經卑職等會查
時已冰雪在地清丈難施請俟今年三月停徵以後八月開徵
以前及時趕辦惟粮地村落較多戶名清查不易必須分設局
所添派委員並籌給一切經費款項以期速歲事而免擾民復
經卑職等首肯荷憲示允行本年四月初間卑職洪謨遵復由省
馳抵化城會同卑職龍光在大青山後兩項做地內劃分村落
分設六局遴選留城當差各員並捕盜營經制外委各帶書差
弓手眼同各村甲會首核實查丈並移經山後駐扎練軍分派
弁兵帮同彈壓所有各委員薪水車資並弁兵書差人等津貼
飯食以及各局心紅紙張一應雜費均經面呈蒙憲恩遂辭欵

給發卑職等會同唱喏在事員役並出示曉諭各村不准絲毫
擾累民間洪謨督同分局各員親詣糧地各村逐加履畝查丈
查該大青山後廠地及四旂空間廠地兩項共原額地七千二
百三十三頃五十五畝一分五厘每畝徵租銀二分一厘五毫
統共額徵銀一萬五千五百五十二兩一錢三分五厘七毫二
絲五忽現在逐加查丈核其地糧各數尚與原額相符一面稽
查地畝現係何人承種隨即核對糧簿是否糧名相符如有頂
名承種情弊即眼同該管糧甲暨現種地戶三面考對明白逐
一過撥的名更正糧簿俟過割清楚後將糧簿編造存案各該
村亦各存留副本嗣後續有買賣地畝過割糧名均令互相考

核惟現值大役甫過更不免有逃亡之戶荒棄之地現經卑職
等詣切曉諭各村糧甲會首等令即詳細稽查有三者趕緊招
徠復業無主者即另招民認種務使地無曠土種無缺額現已
於七月初一日洪謨督同分局各員將兩項糧地逐一清大完
竣種名亦皆過撥清楚當即撤局仍回歸化會同卑職龍光查
此兩項糧地前因地糧戶名諸多混淆輾轉非糧差莫知底蘊
不能徵糧致糧差窟穴把持銅弊甚深革除非易且出後距城
寫遠該納戶等向祇認有糧差並不知有投櫃往往將應納之
糧多交糧差之手致該糧差種種索擾或有如褚侍御所云者
今既將糧地逐一查清徵糧已有把握自應將舊畧承票糧

之十二宗糧差一律永遠裁革嗣後即有糧戶抗欠不完及糧頭經催不力不得不飭差傳比者由龍光隨時另發安差傳喚決不再用舊日糧差以清積蠹而除民害惟各村應納糧銀尚須有人催納卑職等現已出示曉諭各村令舉公正大戶充當該村糧頭經催該各本村之糧自光緒二十年八月開徵起務令各花戶將應納糧銀自封投櫃以杜包收等弊抑卑職等更有請者糧差積弊既經革除善後章程尤應妥議現經卑職等會議得徵糧章程遵照前撫憲剛定章每交正銀一兩隨加平耗銀一錢二分自封投櫃其有因買銀不便通融折錢交納者亦着按照時估核算不准另外加價每年自八月初一日開徵

後將逐日銀價時估牌示署前俾納戶週知以杜浮索等弊至
嗣後買賣糧地必須隨時過割糧名但恐糧書一索使費必至
小民視為畏途仍將糧地私相授受糧名舛錯舊弊復生現經
卑職等嚴定章程嗣後過割糧名只准酌給筆資不准濫行需
索至各村遇有逃戶遺糧累及現戶代納亦殊累民應令嗣後
如有新逃之戶無着之糧若逃在收秋以後規避完糧輒行逃
隱應不准其報逃免糧外其逃在未收秋以前者准該糧頭隨
時報明一面招民認種一面即除免徵以免逃糧貽累以上各
條應令各村在於公所刊立石碑永遠遵守所有用過各局經
費各數目應由龍光詳細開摺方文中報外理合將查清糧地

革除糧差暨會議善後各緣由會銜詳請憲台查核轉請覆奏

施行

戶口

本城八十一街巷設立街長八十一名牌長三百三十一名共三百三十一牌計三千十七戶男一萬六千五百二十三名女八千二百七十九口

以上男女共二萬四千八百二名口

四鄉共三百七村設立村長一百二十名牌長七百七十八名共七百七十八牌計七千六百七十八戶男四萬八千五百八十六名女二萬七千九百八十九口

以上男女共七萬六千五百七十五名口

城鄉共男女十萬一千三百七十七名口

謹按以上男女數目係照每年保甲奏銷冊簿開列現查
家數村庄屢有增添此數恐多未確俟後詳加稽查再行
續入

錄奏章

光緒十年三月巡撫張之洞奏竊臣接准綏遠城將軍豐紳歸化
城副都統奎英來咨具奏土默特界內歸化五廳寄居編籍勢
必佔礙該祈游牧擬請各廳體制復舊勿編民籍一摺欽奏咨
會到臣當即飛飭布政使奎斌歸綏道阿克達春詳切查覆去

後茲據奎斌稟稱遵查七廳議編戶籍原以種地客民生齒日繁故就邊外原有民人編戶立籍原有田地清畝立冊既非拍內地之民添移邊外亦非使邊外之民另佔蒙地清其根抵定其法制將來增丁減口有籍可稽奪地逃糧有冊可考可以詰奸究可以禁侵佔不使如前之漫無稽查於游牧何礙前請編查戶籍實與該將軍等所引雍正十二年理藩院奏准設立牌甲之意正相符合今該旗以民蒙雜居則相安編籍則有礙豈雜居足以禁侵佔盜買一經編籍反無以禁之如此論誠不可以理測窺其不願之隱所謂慌懼者非懼客民佔其地實懼蒙官失其權耳從前歸化等五廳蒙民交涉命盜重案及有闖徒

罪以上之案例由土默特蒙員會審尋常詞訟向歸廳員自理
並無會審明文近來無論地土錢債細故一經在廳涉訟蒙古
即赴副都統衙門具呈該衙門不問事之大小即委蒙員會審
其與訟也多係指荒奪熟逐佃增租有利則徇無利則驅逐
恣意營私已非一日今知改設廳制恐難施其故智此不願之
在蒙員者也各處副都統於地方公事例不干涉而歸化五廳
向有交涉事件儼然盡屬管轄過有商民事務副都統亦出示
曉諭一經改制慮失攬越之權此又不便之在副都統者也軍
興以後五方游民雜處其間強悍漸形土客混淆殊非所宜自
前編籍清賦實足綏邊弭患乃庸常淺識見不及此上下膠執

殊難理解該藩司去歲奉檄查邊悉心體察各廳編查戶籍係屬地方要政且與土默特蒙古毫無妨碍該蒙古安居自適初不知改設為何事焉有無故慌懼之理此不過無知蒙員造言生事意在阻撓合將慌懼實非出自蒙情編籍不致有礙游牧各情形查明稟覆等語又據阿克達春稟稱查歸化等廳之在土默特地面與直隸張獨多等廳之在察哈爾地面情形稍有不同者察哈爾蒙古在

本朝已編隸八旗而土默特蒙古自命外藩欲私分土故邊制更難措手溯查土默特蒙部明季時實已為察哈爾林丹汗所襲滅其部人或役屬於察罕或逃匿於他處我

朝天聰年間

大軍征破察哈爾進師歸化城林丹汗由歸化城西遁土默特頭目等始得集眾投誠我

朝興滅繼絕令其仍居土默特游牧復其前明順義王封爵未幾該蒙人有與明邊將通謀欲邀

大兵歸路遂執其王削其爵因分土默特為兩翼而以投誠兩頭目世襲二都統分統之嗣後裁併為一副都統又改為由京簡放當土默特投誠時地已非其所有而該參領等尚謂帶地投誠一若不知其地為我

朝賞還之地觀其所稱我

朝定鼎分界邊牆各守各土不容越佔等語殊有乖於普天王土
之義至其所慮民人一編戶籍即成土著必致佔蒙古之牧地儼蒙
古之生計則有必不然者查土默特部附近邊內其服食起
居竟與內地民人無異漸至惰窳成性有地而不習耕芸無畜
而難為孳牧惟賴民人租種其地彼纔有糧可食有租可用故
現在該蒙古以耕牧為生者十之二三藉租課為生者十之七
八至該旂所謂游牧地戶口地者自康熙年間以來久已陸續
租給民人以田以宅二百年於茲矣該民人等久已長其子孫
成其村落各廳民戶何止烟火萬家此等寄民即不編籍亦或
土著歷年既久寄民漸多迨同治年間因陝甘回氛不靖口外

剿防喫緊各軍有在此駐扎者有由此經過者迄今遺勇尚多
在雍正年間寄民尚少之時僅止設立牌甲已足稽查邊祗而
近來寄民之久居者益多若僅設立牌甲而不為編定戶籍則
人無定名籍無定戶土客混淆而莫辨賦役散亂而難稽欲施
治理誠難措手現定編籍章程亦無非就各廳原有之民人查
明戶口編立冊籍且所編既名為戶籍則籍內亦只編戶口本
與地土不相關涉況蒙地例准民租不准民買民人雖編定戶
籍地主則仍屬蒙古嗣後蒙古所留為牧廠者蒙古若不租給
民人民人焉能佔及牧地且民人之編戶籍亦與蒙古比丁無
異蒙古比丁有年初不聞生齒日繁將民人擠回戶裡民人編

籍以後亦何至人稠地窄將蒙古擠往後山况口外寄民若不
編定戶籍則現在者既漫無稽考未來者更漫無限制不但有
人滿之患且恐盜賊竊發蒙民械鬪釁皆由此而起若一編戶
籍良民之有業者方能編收入籍游民之無籍者即可驅逐出
境並將後來寄民定有入籍年分則續來者亦有限制庶客民
不至麇聚蒙地亦無慮鳩居而且戶籍既編則客土分而良莠
易別盜賊息而蒙民皆安乃反謂不編籍則雜居尚可相安一
編籍則闔旗無不慌懼此理甚不可解至於著籍之戶或有滋
事之人輕則查明原籍遞回管束重則徒流軍遣

國有常刑當不慮滋事難逐一登

天府之版圖即成羗民之淵藪也至沿邊州縣如晉省之保德州河曲偏關等縣亦皆有會審蒙民交涉事件該州縣不但印文內並無管理蒙古字樣即官銜內亦未必有加理事銜明文然蒙古不能不服其說斷者以

國自有定例也况我

朝制度凡理事官員皆能管旗民蒙民各交涉事件並不在乎印文內有無管理旗蒙字樣即如綏遠城將軍印文並無管轄旗人字樣歸化城副都統印文亦無管轄土默特蒙古字樣若必將管轄事件逐一鑄入印章恐數寸篆文殊難一一核載矣總之廳員雖改撫民印文雖經改鑄而撫民同通仍請加有理事

銜業經奏明在案該蒙古若恪遵

朝廷官制

皇上諭旨交涉事件斷不至難於辦理等情先後稟復請奏前來
臣查口外七廳因歷年吏治不修邊政廢弛深恐數匪養蠱蒙
民不能綏輯是以奏請改為撫民同通奉

旨允准後復飭藩臬兩司歸綏雁平兩道籌議未盡事宜因阿克
達春久任塞外全斌熟悉邊情特飭該道詳擬條目該藩司親
往體察奎斌周歷回省後據稱目前改章整飭眾情帖然欣欣
望治臣覆加審核兼考諸歷任邊外各員始行陳列十二條於
上年九月二十二日奏請

救議施行茲閱豐紳等鈔奏實深駭異查戶籍三等之外里甲不
具保結者即行驅逐遞籍並議編造牌冊分別良莠此臣原奏
之第五條也清界限察蒙情使蒙無失牧之憂此臣原奏之第
六條也臣仰體

朝廷一視同仁之義綏邊弭患之規現在辦法皆民蒙兩益之事
編籍一條正是原本雍正年間奏准設立牌甲舊章辦理既非
遷內地流民以實邊方亦非使現有客民另占蒙地夫大青
山以南歸化城以東以西延袤數千里西漢元朔以來久為郡
縣即定襄雲中五原三郡之境況以

國家休養生聚二百餘年士農工商數十萬戶斷無驅還口內之

理著籍興否於蒙古生計何干若如所奏則是土客清雜轉可
相安法制井然反生疑慮臣愚思之良所未解竊惟遼瀋以北
吉林以東乃

聖朝豈錫

龍興之地今皆編有民籍版冊蕃庶學校莘莘豈默特一區便
應自為風氣至摺尾所請體制復舊一條尤近枝蔓謹考七廳規制
祖宗以來屢有變通無非因時制宜且臻美備土默特初設蒙古世
襲副都統繼改為由京

簡放副都統並設常駐將軍七廳初設協理筆帖式繼改為
通判繼又或改為同知繼又增設歸綏道若必復舊而後可然

則將盡罷將軍副都統一切文武各官仍復世襲都統蒙部乃
能安居乎茲據奎斌阿克達春先後查明稟復各節甚為明晰
淺顯總之因編戶籍而侵奪牧產實無此理因改撫民而蒙衆
慌懼實無其事相應據實奏陳仰懇

敕部仍照臣前奏各條迅速議覆以便遵行

皇仁

...

歸化城廳志卷之七

關稅

禮王制關執禁以譏杜不異服識異言是古之為關者凡以禦
暴而已非歛其財也自北齊始五關市邸舍之稅唐德宗始
於諸道關津置吏以歛稅殆近世關稅所自時歛歸化地居
漠南其北通山後部落喀爾喀各札薩克等處東通察哈爾
蒙古八旗西通烏拉特鄂爾多斯遠至新疆伊犁地方其商
販之由外至者則有外藩諸部落及直隸關東山東河南廣
東各省每屆秋冬之交商貨雲集百貨麇聚誠塞外一大都
會也我

朝自乾隆年間設立歸化關始以理藩院司員掌之繼交歸綏道
經理部頒稅則百分抽一較之前代十收其二三十稅一者
已有霄壤之別尤兢兢以不重徵禁苛擾為戒

朝廷深仁厚澤洵足超越千古已歷任監督胥以實力稽徵嚴戒
需索為心蓋下以惠商民即上以裕

國課也不其懿歎謹詳識於冊而以本廳所徵當課等稅附焉志
關稅

歸化關額徵雜稅正額銀一萬五千兩

又額徵雜稅盈餘銀一千五百兩內

應解交內務府侵價銀二千兩

應解交戶部餉銀八兩

應支發稅局房租銀三十六兩

應支發東西南北柵欄四處房租銀四十八兩

應支發新紅紙張銀七十二兩

應支出土默特備買公價銀一千五百兩

應支發十三口岸書巡餉食銀一千六十二兩

應支發看庫邏軍餉食銀十八兩

應支發綏遠城馬隊官兵餉銀一萬一千數百兩

歲無定額

應支發伊犁官兵俸餉銀七十二兩

以上係襍稅項下歲出額數

歸化關額徵牲畜稅錢九千串

無額定盈餘內

應支發土默特公費暨兵丁操演盤費銀七千兩

此項以所徵牲畜稅錢易

銀給發

應支發蒙古筆帖式飯錢七千八百文

應支發綏遠城牲畜稅所房租錢十千八百文

應支發和林格爾牲畜稅所房租錢十千八百文

應支發薩拉齊牲畜稅所房租錢十二千文

以上係牲畜稅項下歲出額款

歸化關徵收洋藥稅銀儘徵儘解 並無正餘定額稅銀解交戶部

應解交戶部洋藥飲食銀二十一兩一錢二分九厘二毫

應解交戶部洋藥加平銀二十一兩一錢二分九厘

以上係洋藥稅項下歲出額款

凡歸化關徵收各稅銀及每年批解支發各款均由監督道憲
自行經理

會典內載乾隆二十六年覆准歸化城適中之地設立總局收
稅於東西南北四處各設柵欄一座派役稽查其綏遠城歸化
城和林格爾托克托城薩拉齊西包頭昆都倫十家子等處
設立蒙古筆帖式二員併安設書役抽收四項牲畜稅錢

又載乾隆三十一年覆准歸化城稅務派理藩院司員徵收
又載乾隆三十三年覆准歸化城出產油酒烟皮張等項及關

東等處發來商貨從草地行走未經殺虎口徵稅者俱為口外
土產歸化城按則抽收其內地一切雜貨販運出口經由殺虎
口納過稅銀到歸化城入鋪零星發賣者不再重徵若貨物運
抵歸化城以後商販車載馱運又販往他處售賣者則無論土
產與外來貨物均於出柵時按則收稅至民間零星日用物件
如布止一二匹烟僅兩三包者不在收稅之例嚴查家人胥役
無許苛擾

卷查乾隆三十四年二月大學士尹 等奏本月十七日山西
巡撫鄂寶覆奏歸化城稅務一摺奉 硃批軍機大臣議奏

欽此據稱歸化城管關之員既於推務未能核實自應

旨改歸巡撫兼管查該處雖有歸綏道駐紮固可就近代管但
常川經理難保日久無弊請於現任道府內揀員派往一年更
換臣不時稽查所有現任監督瑪爾洪阿已屆期滿應即揀員
接管再從前所收銀數難為定額俟另派委員第一年徵收過
銀數臨期核定再為酌定等語查關口稅務自當儘收儘解從
前歸化城關稅止解正額其餘漫無稽查致啟家人胥役中飽
滋弊殊非核實權務之道向所派理藩院司員既非該撫所轄
難以查核嗣後該關稅務應改歸山西巡撫兼管派委道員以
專責成庶耳目易周稽查得實於關務自更為慎重所有理藩
院司員派管之例即行停止再該撫既稱歸綏道即駐紮該處

若令常川經營恐至日久弊生應如該撫所奏選派道府賢員
具摺奏明按年更替則交代盤查每歲皆可核實清厘自不致
復滋弊竇至所收稅額亦應如所奏俟試收一年再行酌定惟
是立法之始一切均須該撫悉心督理酌定章程並嚴飭委員
實力承辦毋任胥役人等稍有侵漁滋擾庶商民兩有裨益是
否有當伏候 訓示俟 命下臣等交部行知該撫

遵照辦理

謹案會典內載乾隆三十五年覆准歸化城徵收雜稅銀兩併
牲畜稅錢以銀一萬五千兩錢九千串作為正額其餘銀一千
五百四十八兩有奇錢一百三十七串有奇作為贏餘

又載乾隆四十一年復准歸化城徵收稅銀四冊之外商賈多

有繞道偷越責成該處營弁於巡防之便在和林格爾東北塔
兒二處查察如有偷漏拏送管稅道員查辦

又載是年覆准綏遠城所開麵舖在本城發賣兵民零星食用
者不准收稅如有車載馱運他處售銷者照歸化城之例一體
收稅

又載乾隆五十二年奏准各關需用收稅冊檔歸化城山海關
於關期未滿三月以前會差赴部印發

又載嘉慶四年 欽定贏餘數自歸化城一千六百兩 現在
實徵

銀一千五
百兩

又載歸化城凡商販貨物按馱料稅者編多有按斤付箱匹張

箇雙担科稅者牲畜按數油酒舖房分上中二則按年科稅土
默特蒙古牲畜稅每價銀一兩收制錢八文均照部頒現行條
例徵收

惟牲畜稅起於土默特人員記檔蓋為稽查盜賣馬匹每價銀一
兩抽制錢八文其錢充土默特公費乾隆二十六年因商人記
檔後輒從小徑販往他省希圖漏稅經殺虎口監督期成額奏
請將土默特抽收記檔錢文作為正額歸殺虎口兼收即由監
督給發土默特公費報部查銷三十一年副都統吉福條奏蒙古
各札薩克趕牲畜來城殺虎口收稅差人不通蒙古言語僅記
牲畜錢文數未及其姓名旗分佐領遇有盜賊事件無從稽

查因派理藩院章京一員駐歸化城管理牲畜稅並將烟油酒皮地落地稅亦歸其兼管此抽收牲畜稅之始也

權烟油酒雜貨稅起於乾隆二十六年因殺虎口監督期成額奏稱蒙古地方現種烟葉雜糧製造油酒烟等項在歸化城一帶售賣漸成行市即為口外土產應行起課經戶部議准與皮張雜貨均附於落地木稅按則抽納此抽收烟油酒雜貨稅之始也

權鐵器稅起於乾隆二十六年殺虎口監督期成額奏鐵器出口欠千例禁現在應否禁止經戶部議准除廢鐵料等物有礙打造軍器者仍行禁止外如祇係農器及民間日用器物即行

按則收稅將名色件數註於票內令該商持票赴口驗明放出
到城後如有販往他處售賣者出柵時仍行抽稅與油酒烟雜
稅同此抽收鐵器稅之始也

油酒二項除按鋪徵收課銀分別上中戶五兩及二兩五錢外無
論就地貨賣及販運他處俱照殺虎口例按駝徵收其數不及
駝者亦照該口則例燒酒胡麻油每駝收八分脂麻油每駝收
稅一錢二分每驢一頭可載油酒一百二十斤之數酌斤折收
此歸化城抽收油酒烟雜貨稅之章程也

歸化關徵收落地雜稅設有總局一所東西南北柵欄四處徵收
牲畜稅設有歸化城綏遠城西包頭薩拉齊托克托城和林格

爾崑都崙八十家子等八處舊統計總局暨大小稅口共三十處咸豐四年七月經巡撫恒春奏稱歸化城口岸西包頭鎮薩拉齊扎克托城三處皆濱臨黃河商民販運雜貨由河路行走程途較近且和林格爾亦有歧路可通各處商販每多不赴歸化城納稅分撥即由四外繞越偷漏若不設法變通不特稽查難周且稅課有虧所關匪細查西包頭鎮等三處均設有歸化關牲畜稅廳一切雜貨既圖捷徑行走仍令繞道由歸化城完稅後再分撥各處銷售未免行旅跋涉似非體恤商人之道應請嗣後從口販來一切雜貨並從口外販入土產等貨即就近在西包頭等處稅廳照例輸納並即設立禁印稅票有赴歸化

城售賣者入柵時驗明放行毋許再征等因蒙部議准行六年
鍾道任內經巡撫王委員擬定章程十二條如西包頭鎮應設
立稅廳一所以收該鎮稅務又甯夏貨物西包頭鎮收稅已久
仍照舊辦理無庸另議更章又各項南貨由殺虎口河包營並
繞越歧路而來者到西包頭鎮按則納稅其在本鎮零星買賣
及載往他處售賣者無論多寡均免重納又南貨及關東席貨
已在歸化城納稅有髻印稅票者到鎮驗明放入於出鎮時無
論商民多寡概免輸納又口外土產及後山各部落所出一切
貨物無論鄉民及客商交易收買而來者入鎮免其納稅其在
本鎮售完者亦免惟再由本鎮運往他處捆載成馱成車成担

出鎮時均按則徵稅倘至歸化城售賣或由城經過但驗明印
票放行無許再徵如運至歸化後又復販往他處仍照舊章辦
理又鄉民在包鎮買田日用土產各物出鎮時每樣計稅不過
五分者免其輸稅再有多餘按則收納又商人到山後各部落
收賬並外藩收於牲畜種地人民程途較遠後山路上無買食
類油烟酒之處應准酌帶以示體恤但須予以限制方免弊混
如麩止二百斤油酒各止五十斤烟止二十斤概行免稅再多
仍按則收納又南貨由河保營而來有托克托城薩拉齊兩處
歧路可以繞越歸化城西包頭鎮即分往各處售賣應於薩托
兩處向有之牲畜稅屢派役稽查以免偷漏如情願就近輸稅

准其在各該處按則交納以免跋涉之苦又後套河西及薩屬
各村鎮裝載船筏土產各貨及由托城下河水運前項各物內
有並不經由包薩而必須經過托城之河口者自應准其即在
托城舊設牲畜稅廳納稅如在包薩上游裝載貨物情願就近
在包薩完稅者亦聽從商便又薩屬各鄉村所產菸葉除在本
村鎮零星售賣免其完稅外如商人收買或馱或做成烟包發
往他處者照則准其在包薩納稅蓋印放行到歸化城免其重
納又包鎮土微物如西瓜瓠絲箕帚雞子麪筋瓜窩麵盆巨羅
葱蒜布鞋襪補襯布子兔皮驟皮汲水柳斗鑲鉄木斗升出
入概免納稅如查獲偷漏之人稟官照例究治其管稅家丁書

役不准擅自科罰如違准被害人呈告以上各條俱奉批准行刊刻木榜曉示此歸化等處稅口歷次添設之始末也

客商匿稅不納課程者笞五十貨物一半入官客商船舶到岸即將貨物盡寔報官抽分若停塌沿港土商牙僧之家不報者杖一百雖供報而不盡寔罪亦如之貨物並入官傳藏之人同罪凡周歲額辦茶鹽商稅諸色課程年終不納齊足者計不足之數以十分為率一分笞四十分加一等追課納官此歸化關監督歷來遵行之條例也

歸化城廳經徵當帖課銀三百十二兩

乾隆初年起徵現在城鄉當舖共五十二座每當舖帖一張每

張歲納課銀六兩其銀按年解交副都統衙門

又光緒十四年奉文每當舖一座預支二十年課銀一百二十兩報解在案

又光緒二十三年奉文每當舖一座加徵課銀五十兩

歸化城廳經徵牙帖課銀二十五兩二錢

計牙帖二十一張每張歲納課銀一兩二錢其銀按年解交藩

庫

歸化城廳經徵缸油帖課銀三十兩

道光十二年起徵本城現開缸房九座油房三座每座領帖一張共帖十二張每張歲納課銀二兩五錢其銀按年解交監督

道憲衙門

歸化城廳經徵葯商坐票課銀二百八十八兩

計票十二張每張歲納課銀二十四兩自光緒十二年起按年解交籌餉局

歸化城廳經徵酒釐

光緒二十二年起徵每酒一斤徵制錢三文現在城鄉缸房共七十八家所徵之錢易銀解交藩庫

歸化城廳經徵菸釐儘徵儘解

光緒二十二年起徵每水菸一斤徵制錢十文旱菸一斤徵制錢五文所徵之錢易銀解交藩庫

附土默特徵收煤炭空窰稅

乾隆三十三年由將軍富梁等奏定大青山哈莫爾阿利莫圖
清水河喀喇烏克爾圖等四處煤炭空窰每年派土默特恭領
一員總管每處派佐領驍騎校前鋒校等各一員駐扎收稅額
稅二千餘兩內除三成作官兵盤費七成交庫收存此外如另
有呈請開挖之處據呈委員驗明有無妨礙立限發給印票准
其開挖俟果開有煤炭再行發給印票准其出賣飭令附近管
窰口各官照常收稅如開挖竟後竟無煤炭准其將票交回委
員封閉空窰口



济卹二士頁 三行

「五千餘萬名口」

显有讹误，当为

「五千餘名口」

误多写一「万」字。

卷之七 雜印 十四頁 脊一行 十五字

寔合。

存為寔合。